

# ପ୍ରବନ୍ଧ-ମାଳା


( ତୃତୀୟ ଖଣ୍ଡଃ ଗ୍ରହଣ-ପ୍ରଶସ୍ତି ବାରୋ ସଂସ୍କୃତି )

ଡଃ କାଳୀପ୍ରସାଦ ସିଂହ

ଭଜା ବାବାଇଁସେନା ପ୍ରକାଶନୀ

କଟକସରମ

ଫେବୃଡ଼ି, ଶିଳାଚର-୧୫୮୦୦୭



# ପ୍ରବନ୍ଧ-ମାଳା

( ତୃତୀୟ ଖଣ୍ଡ: ଯତ୍ନ-ପ୍ରଶସ୍ତି ବାରୋ ସଂସ୍କୃତି )

ଡଃ କାଳୀପ୍ରସାଦ ସିଂହ

ଅଜା ବାବାଇସେନା ପ୍ରକାଶନୀ

କଟକ, ଓଡ଼ିଶା

ଫେବୃଆରୀ, ୧୯୮୦

Prabandha Mala

By

Dr K. P. Sinha M. A., Ph. D., D. Litt.

পাইলা সংস্করণ :

১লা বৈশাখ, '৯১ সন (১৪ এপ্রিল, '৮৪ ইং)

প্রকাশনাত :

শ্যামসুন্দর সিংহ

অজ্ঞা বাবাইসেনা প্রকাশনী

কচুখরম,

পোঃ—চেংকুড়ি, শিলচর-৭৮৮০০৭

ছাপানিত :

ইমাগো প্রেস

কচুখরম,

পোঃ—চেংকুড়ি, শিলচর-৭৮৮০০৭

দাম : রূপী ১০'০০ হান

## ভূমিকা

ডঃ কালীপ্রসাদ সিংহর প্রকাশিত বারো অপ্ৰকাশিত প্রবন্ধ বারো ভাষণ হাবি পুলকবিয়া 'প্রবন্ধমালা' নাঙে প্রকাশকারে তিন খণ্ডত প্রকাশ করানির দায়িত্ব অজা বাবাইসেনা প্রকাশনীরে নেছিলগা । বর্তমান খণ্ড প্রকাশর লগে লগে ঐ কাম উহান সম্পূর্ণ আইল । প্রথম খণ্ডত বিষ্ণুপ্রিয়া মণিপুরী সাহিত্য বারো ভাষা বিষয়ক রচনা, বারো দ্বিতীয় খণ্ডত সামাজিক রচনা প্রকাশিত আইল । বর্তমান খণ্ডত বিষ্ণুপ্রিয়া মণিপুরী সংস্কৃতি বিষয়ক রচনা বারো সাধুঠাকুর এবং নীতিস্বামী সম্পর্কিত রচনা প্রকাশ করানি আইল । ডঃ সিংহর ভাবী ভাষণ বারো প্রবন্ধ পুলকবিয়া 'প্রবন্ধমালা' (চতুর্থ খণ্ড) অথবা 'প্রবন্ধমালা' (পরিশিষ্ট) নাঙে প্রকাশ করানির আশা আইল ।

প্রকাশক

## সূচীপত্র


### বহু প্রণতি—

- |  |   |
|--|---|
| ১। শ্রীশ্রীভুবনেশ্বর সাধু ঠাকুর—           | ১ |
| ২। শ্রীগোকুলানন্দ শ্রীভক্তামীর জীবন বর্ণন— | ১ |

### সংস্কৃতি—

- |  |    |
|--|----|
| ১। বিষ্ণুপ্রসন্ন মণিপুরী সংস্কৃতি—     | ১  |
| ২। বিষ্ণুপ্রসন্ন মণিপুরী নৃত্য—        | ৬  |
| ৩। বিষ্ণুপ্রসন্ন মণিপুরী লোক-সংস্কৃতি— | ১১ |

মহৎ - প্রশস্তি



## শ্রীশ্রীভুবনেশ্বর সাধুঠাকুর ★

বিক্রীড়িতং ব্রজ বধুভিরিদম্ বিষ্ণোঃ

শ্রদ্ধান্নিতোহনুশ্রুয়াদর্থং বর্ণয়েদ্ যঃ ।

ভক্তিং পরাং ভগবতি প্রতিলভ্য কামং

হৃদরোগমাশ্বসাহিনোত্যচিরেণ ধীরঃ ॥

ব্রজগোপী বারো শ্রীকৃষ্ণর প্রেমকাহিনী অতি পবিত্র । আমি সাধারণ মানুসে সংসারর অপবিত্রতাত ডুকিয়া থায়া ও নিৰ্মল প্রেমকাহিনীর মাধুর্য্য হারপানি নুব্বারিয়ার । চৈতন্য চরিতামৃতকার কবিরাজ গিরকে মতিয়া গেহেগো— “কাম আর প্রেম দোহে বহুত অন্তর । কাম অল্পতম প্রেম নিৰ্মল ভাস্কর ।” “অপ্রাকৃত কৃষ্ণপ্রেম যেন জন্মদেহে হেম । সেই প্রেম নলোকে না হয় ।” ও প্রেমর—ও আনন্দর বিন্দু আগোর লগেও সংসারর শ্রেষ্ঠ আনন্দ উহানে মাস্তা নার । উপনিষদে মাতের — এতসৌবানন্দস্য মাত্রামুপজীবিস্তি । ও পবিত্র গোপীকৃষ্ণ প্রেমর বর্ণনা যোগেয় শ্রদ্ধা সহকারে করের, বারো যোগেয় শ্রদ্ধা সহকারে হুনের, উগোরাও কৃষ্ণভক্তি জাগ্রত অইলকো পুরি, হৃদিগোষ্ঠ কামক্রোধাদি রিপু আচিরে দূরেয় অর । ঠিক উসাদে সাধুঠাকুর বা যে কুনো যথার্থ প্রেমিক ভক্ত আগোর গুণগান যোগেয় শ্রদ্ধা সহকারে করের, বারো যোগেয় শ্রদ্ধাসহকারে হুনের, উগোর হৃদিগো অনুরূপ ভাবে পবিত্র অর ।

ঈশ্বরর বা ভক্তর পবিত্র গুণগান করলে হৃদয় কিয়া এসাদে পবিত্র অরতা বুজোতে, প্রত্যেকগো মানু বা প্রত্যেকগো জীবউ স্বরূপতঃ আত্মা,

---

★ ১৯৭৮ ইংরাজীত গোহাটীত সাধুঠাকুরর জন্মতিথিত প্রদত্ত ভাষণ ।

স্বরূপতঃ পবিত্র এবং ঈশ্বররাঙতো তঙাল নেই । কিন্তু আমার জ্ঞান অজ্ঞানে আবৃত অন্যর ও স্বরূপউহান হারপানি নুব্বারিয়ারতা । গীতার মাতের—“অজ্ঞানেনাবৃতং জ্ঞানং তেন মহ্যন্তি জন্তবঃ ।” কিন্তু আমি যত অজ্ঞানর অন্ধকারে বুড়িয়াউ থাইক, মান্দু আগো যত গুণামি, বদ্‌মাইসি করিয়াউ থাক, তা কিন্তু জানে যে, তা ভুল পথে যারগা—তা অপবিত্র পথে যারগা এবং জানে যে, তা এসাদে করানি থক নাছিল । উহানলো মান্দু আগোর চরকরতে বা যে কুনো সাকর্তি কাম আহান করতে গোপনে করেঃ হুদা উহান নাগয়, গোপনে করতেউ তা নিজরে নিজে মহুত আহানরকা আই-লেউ লাজপার । কারণহান কিহান ? কারণ, আমি স্বরূপতঃ পবিত্র নির্মল । উহানে যেবাকা পবিত্র ভক্ত আগোর চরিত্রর অথবা ঈশ্বরর গুণগান করিয়ার, উবাকা আমার ও পবিত্র স্বরূপ উহান জাগ্রত অর । মহাপুরুষর জীবনী আলোচনার গুণহান এহান ।

যেতাউ অক, সাধুঠাকুরর গুণগান করতে গিয়া পইলাই নিষ্ঠাশিঙ অয়ার তার প্রচণ্ড নিষ্ঠা, একাগ্রতা, আত্মবিশ্বাস, দৃঢ়সংকল্প বারো কঠোর ত্যাগর কথা । কনাক কালেত পুরি ঈশ্বরর প্রতি তার নিষ্ঠা বারো একাগ্রতা বারপুৰাবাসী হাবির দৃষ্টি আকর্ষণ করেছিল । ত্রিপুরার রাজপণ্ডিত মীনেশ্বর সার্বভৌম ভট্টাচার্য গিরকরাঙ লেইরিক তামকরানির সময়তেই তার একাগ্রতা ও নিষ্ঠা দেহিয়া তারাঙ হাবি পূজার তার বেলাদেছিল তার অজা গিরকে । উতার পিছে যেবাকা তা রীতিমত সাধনরাজ্যত হমেইল, ও সময়ত তার একাগ্র সাধনা নবদ্বীপ বারো বৃন্দাবনর অধিবাসী হাবির দৃষ্টি আকর্ষণ করেছিল । সাধুঠাকুর গিরকে নিরন্তর একাদশীভিত্ত পালন করলো এবং একাদশী তিথিত শীতকালে পেয়া বৃন্দাবনর জাড় উহানাত সারারাত যমুনার পানিত গারগো পেয়া বুড়িয়া উচ্চৈঃস্বরে নাম-সংকীর্তন করিয়া থাইল । মেরাকে জাঙ আকহানলো উবা অয়া সারাদিন নামকীর্তন করিয়া থাইল । মেরাকে হাপ্তা আহান বা ততোধিক কাল পেয়া পানি ফুটা আগো না পিয়া ধ্যানধারণা করিয়া থাইল । তার একাগ্র সাধনাত সন্তুষ্ট অয়া তার গুরুদেব শ্রীলকৃষ্ণদাস বৈরাগ্যাঠাকুর গিরকে

বৃন্দাবনের বিশিষ্ট বৈষ্ণবমণ্ডলীর মধ্যে তাকে ঠাকুর উপাধি দিয়াছিল ।

মানবতা যেকা কুনো বিষয় আহানাত নিষ্ঠা বারো একাগ্রতা আহের, উবাকা অন্যবিষয়েদে তার ত্যাগ আহানি উহান স্বাভাবিকহান । যে দিব্য আনন্দরকা তার এ একনিষ্ঠতা, ও আনন্দর-প্রেমর ডাকে তা জগতর হাবি বস্তু ত্যাগ করে পারোছিল । যে ধর-সংসার, মোরেই-জিপুত, ধনদৌলতলো সাধারণ মানব হাবি বিভোলা, উতা হাবি তারাও অতি তুচ্ছ । উহানে তা সদোবিবাহিত গৃহিণীবে বেলেরা উদা-দীন বেশে নিকুলেছিল অজানার পথে—হদা কমণ্ডলু বারো ছিড়াকম্বল আহান সঞ্চল করিয়া । যেকা তা সর্বজনপূজিত অইল, যেকা তার ধনর কুনো অভাব নেয়োইল, যেকা তা মনেইলে রাজপুরর সাদে জীবন কাটানি পারলো, উবাকা পেয়া গিরকে হুদালা কুকর চাকিহানাত কুকর মল দিয়া ধুমেইলো ।

মানব নিষ্ঠা, একাগ্রতা বারো ত্যাগ আহেরতা যেকা তানবর মধ্যে দৃঢ়সংকল্প বারো আত্মবিশ্বাস আহান থার । মোরতা কাম এহান করানিই লাগতই বা পারানিই লাগতই বলিয়া যেকা মানবর মনে দৃঢ়সংকল্প আহান আহের এবং যি কাম এহান যেসাদেউ করে পারতো বলিয়া যেকা মানবর মনে আত্মবিশ্বাস আহান থার, উবাকা তানবরাও প্রচণ্ড নিষ্ঠা বারো একাগ্রতা যেসাদেউ আহের এবং উসাদে একাগ্র এবং একনিষ্ঠ মানব উতার জীবনে তানবর সংকল্প সাধন করে পারতারা, জীবনর সার্থকতা উপলব্ধি কর-তারা । সাধুঠাকুরর জীবনে তার দৃঢ়সংকল্প এবং আত্মবিশ্বাস তারে ক্রমশঃ সাধ-নার উর্ধ্ব উর্ধ্বতর অবস্থাত কারিয়া নোঁছিলগা । তা কাড়ি আহান আতে নানিয়া তীর্থপরিক্রমাত নিকুলেছিল—শুধুমাত্র নিজর গজে—তার প্রাণেশ্বর শ্রীকৃষ্ণচন্দ্রর গজে নির্ভর করিয়া । তা কুনোদিন ভিক্ষা না মাগেছে, মেরাকে কতোদিন না খেয়াউ কাটানি লাগেছিল, কিন্তু শেষে কুনো না কুনো উপায়ে তার আহার জুটিল । কাম্যবলে অনাহারে অনিচ্ছায় পাচ ছয়দিন সাধনার পিছে কিসাদে করিয়া ইন্দ্রজালর সাদে গিথানক আগোয় আয়া তারে ফল সেবা করুরেয়া শূন্যে অদৃশ্যঅছিনী ও যারি উহান হাবিয়েউ

হারপাছি । আকথুরুম পুরীধামে বানার সমরত মারাত্মক রক্তামাশয় নরুৱা আহানে পেয়া প্রায় মরণাপন্ন অছিল, ঐ অবস্থাতো প্রায় পোৱা মাইল পথ ধাপ আহানাত গিয়া পুরীৰ শ্রীমন্দিরে ফোঅছিলগা । আশ্চৰ্য্যজনকভাবে মন্দিরে ফোঅইতে ফোঅইতে নরুৱাহানো বালা অইল । উতার গজে ঐ অবস্থাত সাত দিন সাত ৰাতি একাগ্ৰচিত্তে নাটমন্দিরৰ কুণ আগোত ধ্যানে মগ্ন থায়া তার ইষ্টদেব দৰ্শন কৰেছিল । প্রচণ্ড আত্মপ্রত্যয় বারো দৃঢ়সংকল্প না থাইলে এসাদে আচরণ কৰাঙতো আশা কৰে নরুৱাৱিয়ার । ঐ দৃঢ়সংকল্প বারো আত্মপ্রত্যয়, লগে একাগ্ৰতা, নিষ্ঠা ত্যাগ—এতার ফলে তা জীবনৰ শ্ৰেষ্ঠ ধন আত্মজ্ঞান লাভ কৰিয়া সৰ্বজনপূজিত অৱা গেলগা ।

বৈজ্ঞানিক, সাহিত্যিক, রাজনীতিবিদ বা দার্শনিকৰ জীবনীৰ লগে আত্মজ্ঞ মহাপুরুষৰ জীবনীৰ পাৰ্থক্যহান এহানাত যে আত্মজ্ঞ পুরুষৰ জীবনৰ প্রতি ক্ষেত্ৰত, প্রতিদিন খানি না খানি অলৌকিক ঘটনা খানি থাৱ । সাধুঠাকুৰৰ জীবনেউ উহানৰ ব্যতিক্ৰম নাছে । রক্তামাশয় নরুৱালো পুরীমন্দিরে ধাবদিয়া ফোঅনিৰ লগে লগে তার নরুৱাহান বালা অছিল, ঐ ঘটনা উহান, বারো কাম্যবনে গিথানক আগোয় আৱা ফল খোৱেয়া অদৃশ্য অছিলী ঐ ঘটনা উহানো আগে উল্লেখ কৰলাঙ । উতাছাড়া অসংখ্য ঘটনা সাধুঠাকুৰৰ নিতানৈমিত্তিক ঘটনাত ঘটিয়া গেছেগা । আকথুরুম কুষ্ঠরোগী আগোর দূৰবস্থা দেহিয়া কৰুণাপৰবশ অৱা তাৰে দীক্ষা দিয়া মাতলো যে, নামকীৰ্ত্তন কৰলেই তার নরুৱাহান বালা অইতই । আশ্চৰ্য্যজনকভাবে কতোদিন নামকীৰ্ত্তন কৰানিৰ পিছে তার ঐ দূৰারোগ্য ব্যাধিউহান বালা অইল । আকথুরুম মৃদঙ্গের মহারাজাৰ আকগো পুতক দাকুণ নরুৱালো যেবাক্য মৃত্যুশয্যাত আছিল উবাক্য রাজ্যৰ গতান্তৰ নেয়া জকুৱী দীঘল টোলগ্রাম আহান কৰিয়া সাধুঠাকুৰৰাঙ শোঁগোর জীবন ভিক্ষা চেইল । সাধুঠাকুৰে কতোহান শ্রীগোবিন্দৰাঙ নিবেদন জানেয়া লগে লগে টোলগ্রাম কৰে দিলো যে শোঁগো বালা অইতই সন্দেহ নেই । আশ্চৰ্য্য ঘটনাহান—টোলগ্রামহান পেইতে পেইতে শোঁগো সুস্থ অইল । আকথুরুম নবদ্বীপ বেলেয়া সাধুঠাকুৰ বৃন্দাবনে গিয়াছিলগা, কিন্তু হাপ্তা আহান যিতেগা না

যিতেনা মহাপ্রভুরে তার সেবাইতরে হগনেদে মাশুলো যে সাধুঠাকুরে নব-  
দ্বীপে ফিরেয়া নানলে তা নবদ্বীপ এরাদিয়া যিতইগা । ফলে সাধুঠাকুর  
বৃন্দাবন বেলের বারো নবদ্বীপে আহিল । আরাক আকখুঝুমৌ সাধু-  
ঠাকুরে বৃন্দাবনে যানারকা নবদ্বীপ ষ্টেশনে রাতি বাছেয়া আছে সময় উহা-  
নাত কৃষ্ণদত্ত বুলিয়া গিরক আগোরে মহাপ্রভুরে হগনেদে গোবিন্দজীর  
নাঙে জমি আহান দেনারকা এবং সাধুঠাকুরে ষ্টেশনেস্ত ফিরেয়া আনিয়া  
ঔ জমি উহানাত তারেলো গোবিন্দজীর মন্দির প্রতিষ্ঠা করানিরকা আদেশ  
দিল । ফলে সাধুঠাকুর আলথক অয়া গিয়া গোবিন্দজীর মন্দির প্রতিষ্ঠা  
করলো । ভক্তর শ্রীমুখেস্ত হুনলাঙতা কুনো আকবেদে যানা অইলে  
গিরকে গোবিন্দজীর শ্রীবিগ্রহর মূর্ত্তে গিয়া অনুমতি চেইলোগা এবং গোবিন্দ  
জীর অনুমতি নাপেইলে কুনোগোদে না গেলগা । আরতি বা কীর্তনের সম-  
য়ত সাধুঠাকুরর শ্রীদেহাগোত অষ্টসাত্ত্বক বিকার দেহা দিয়া মূর্চ্ছিত অয়া  
অয়া পড়িল ঔ যারি ভক্তবৃন্দর মুখে মুখে প্রচলিত অয়া আছে ।  
এসাদে করিয়া অসংখ্য অলৌকিক ঘটনা সাধুঠাকুরর জীবনে ঘটে গেছেগা ।  
তার প্রিয় শিষ্য শ্রীকৃষ্ণকুমার দেববর্মায় আকদিন তার জীবনকাহিনী  
খানি হারপানি মনেয়া আংকরলে সাধুঠাকুরে মাতোছিল যে ঔতা হারি  
অলৌকিক ঘটনা, উতা মাতিয়া কিতা করতু ? কুংগোয় বিশ্বাস করতায় ?  
আধুনিক বুলিয়া গবিত গিরিগিথানিয়ে মহাপুরুষর এসাদে অলৌকিক  
ঘটনা উতা বিশ্বাস না করতারা । ঔ বিষয়ে দীর্ঘ আলোচনা আজি সম্ভব  
নেই, ছুদা কথা আকহানি মাতে পারিয়ার যে, এসাদে অতিপ্রাকৃত বস্তুর  
সত্যতা হারপানিরকা গুরুর নির্দেশ অনুসারে spiritual labora-  
tory ও practical experiment করানি লাগের । Experi-  
ment বারো observation করানির আগে যেগোয় কুনো বিষয়  
আহান স্বীকার বা অস্বীকার করের, উগোরে বৈজ্ঞানিক চিন্তাসম্পন্ন মানুগো  
বুলে নুৱারিয়ার । যদি কুনোগোয় মাততারা ঔসাদে উপলব্ধি উতা কল্পনা-  
প্রসূত, উহান অইলে মোর উত্তরহান এহান যে-মোর কল্পনাদ্বারা যদি  
অমাটিক সুন্দর বিরাট আনন্দ ধাম আহানর সৃষ্টি অর, সেহান পেইলে

জাগতিক হাবিতা কামনা বাসনা, হাবি পার্শ্বিক প্রবৃত্তি দূরেই অর, হাবি অজ্ঞানর আধার দূরেই অর, উহান অইলে চেইক—যে মি এ আনন্দঘন জ্ঞানঘন জগতর শ্রুটা ও মি উগো কতি বিরাটগো, অর্থৎ ঘুরিয়া ফিরিয়া গিয়া আত্মার মহত্ব স্বীকার করানি লাগতই । তদুপরি, এসাদে আত্মজ্ঞ মানদুর বিশ্বব্যাপী প্রেম, হৃদয়র প্রসারতা হাবিরউ স্বীকার করিয়ার । এসাদে হৃদয়র প্রসারতা বারো প্রেমর ব্যাপকতা প্রাচীন, আধুনিক, বৈজ্ঞানিক, ঐতিহাসিক, রাজনীতিবিদ হাবিরউ আদর্শহান । এবং যেহেতু ওসর্বজন-স্বীকৃত বিশ্বব্যাপী প্রেম উহানর উৎকর্ষতা এ আত্মবোধত আহের এ আত্মবোধ জগতর মঙ্গলজনক ।

ভারতীয় ঋষির আদর্শ দূহান—আত্মার মূর্তি বারো জগতর মঙ্গল ‘আত্মনো মোক্ষার্থং জগদ্বিতায় চ’ জীবন পণ করানি পারেছি উতায় পৃথিবীত মহান মহাষি অয়া গেছিগা । জগতর মঙ্গল উহান যে আদর্শহান, উহান সম্বন্ধে প্রাচীন আধুনিক কারো মতভেদ নেয়ইতই, কিন্তু আত্মার মূর্তি উহান যে আদর্শহান অনা থকর, ও সম্বন্ধেই মানদুর প্রশ্ন বা সন্দেহ । উহানর যথার্থ উত্তর এ সংক্ষিপ্ত ভাষণে সম্ভব নেই, তবে ও সর্বজনস্বীকৃত যে জগতর মঙ্গল, ও দৃষ্টিভঙ্গিলোই মাতে পারিয়ার যে, যেতায় আত্মার মূর্তিরকা জীবন সমর্পণ করেছি, উতায় কিসাদে প্রচণ্ডভাবে জগতর উপকার করিয়া গেছিগা চেইক—গৌতম বুদ্ধর সমগ্র পূর্ব এশিয়ারে একসূত্রে গিথে দিয়া গেছিলগা । মোহম্মদে সমগ্র ইসলাম জগতর একত্ব সাধনা করে দিয়া গেছেগা, শঙ্করাচার্য্যর সমগ্র ভারতরে এক প্রাণে মিলা দিয়া গেছিলগা, আধুনিক যুগে শ্রীরামকৃষ্ণ বারো বিবেকানন্দর চিন্তাধারা বিশ্ববাসীর প্রাণে নুড়া মিঙাল আনে দিল । কারণ, এসাদে আত্মজ্ঞ মানদুর চিন্তা বারো প্রেম এত এত নির্মল বারো এত ব্যাপক যে, তানু যেপেয় বয়াউ যেতাউ চিন্তা করকা, ও চিন্তা ও কাম জগতর মঙ্গল সাধন করে ।

আমার সাধুঠাকুরর কথাত আহিক, কনাকতো পুরি সমাজ এরেদিয়া গেছেগাগো গিরক এগো, কিন্তু তা এ সমাজর কি বিরাট উপকার করিয়া গেছেগা, উহানর ইয়ত্তা নেই । গিরকে যেবাকা নবদ্বীপে পইলা গেলগা

উবাকা নবদ্বীপের মানুষেরে আমার মণিপুরীয়ে মিয়াম হের দৃষ্টিলো দেখলো  
 এবং সাধুঠাকুরো মণিপুরীগো অনার তারে অনেক অপমান করেছিল।  
 কিন্তু মহন্ত, ভক্তি, নিভীকতা স্পষ্টবাদিতা ইত্যাদির ফলে সাধুঠাকুরে  
 হাবির শ্রদ্ধা অর্জন করলো। হুদ্দা উহান নাগয়, উহানে তা মিয়াম আঘাত  
 পাছিল। নবদ্বীপের বুকুগোত তার ইষ্টদেবের আদেশে বিরাট ধর্মীয় প্রতিষ্ঠান  
 আহান বহেয়া গেলগা। পার্থক্যহান চেইক সমগ্র সমাজহানে শ্রীরাধাকৃষ্ণের  
 রাধামাধব মন্দিরগো পরিচালনা করতে হিমজিম খেইতারা, কিন্তু সাধুঠাকুরর  
 হুদ্দা ইচ্ছার ফলে কিসাদে বিরাট প্রতিষ্ঠান আহান চলে যারগা। ত্যাগর  
 মহন্ত এপের; যতহান আমি ত্যাগ করে পারিয়ার ততহান আমি পেয়ার।  
 সাধুঠাকুর সর্বত্যাগী সন্ন্যাসীগো অইলেউ মণিপুরী সমাজর মঙ্গলরকা তার  
 চিন্তার অন্ত নেয়োছিল। উহানে মণিপুরী তীর্থ যাত্রীর সুবিধারকা বুলিরা  
 তা গোবিন্দজীর মন্দিরর লগে যাত্রী থানার বন্দোবস্ত আহানো করে দিয়া  
 বিষ্ণুপ্রিয়া মণিপুরী তীর্থ যাত্রীর বিরাট মঙ্গল করে দিয়া গেছেগা। গিরকে  
 মাতেছিল কনাকতো সমাজ বেলেয়া আয়া সমাজর কোনো কামে না লাগলু  
 আরো সমাজর মঙ্গল আহানি করুবারিরকা পাউরি গোবিন্দজিয়ে এ মন্দির এগো  
 প্রতিষ্ঠা করে দিলতা। ঘুরিগো যেপেরতো যাকগা, সূতাগাছ নাটাইগোত  
 আছে, উসাদে যেপেরতো যাকগা, নিজর সমাজর বন্ধন দেহিয়া কোনোগোর  
 যানা নুব্বারতারা। হুদ্দা মন্দির প্রতিষ্ঠা নাগয়, উতার বাহিরে সাধুঠাকুর  
 গিরকে আমার সমাজর কি বিরাট মঙ্গল সাধন করিয়া গেছেগা, উহান সমাজর  
 ধর্মীয় ইতিহাস আলোচনা করলে দেখতাঙাই। সাধুঠাকুরর আগে হাবিউ  
 বৈষ্ণবধর্মী বুলে বুলে মাতলা, কিন্তু দ্রীচৈতন্যর যথার্থ ভক্তিমার্গ  
 অনুসরণ করেকুরা আকগো নেয়োছিল। ও সময়ত যেতা ধর্মসাধনা  
 করলা উতা অধিকাংশই সহজিয়া পন্থী—ইমাইন্দোল লগে নিয়া সাধনা।  
 এবং এ সহজিয়া পন্থীত অনেক ব্যভিচারর সম্ভাবনা আছে এবং বাস্তবিক  
 পক্ষে সমাজে অনেক ব্যভিচারর সৃষ্টি অছিল, উহান যেতার এ বিষয়ে  
 তলেয়া চাছি উতায় জানি। ও অবস্থাত সাধুঠাকুরর পবিত্র প্রেমভক্তির  
 মতবাদ সমাজরে ও ব্যভিচারর পথেস্ত উদ্ধার করিয়া নূতন পবিত্র মার্গ

আগো দেখা দিলো । এহান বিকুঁপ্রয়া সমাজর প্রতি সাধুঠাকুরর হাবিস্ত  
ভাঙর দানহান । শ্রীহট্ট, ভানুগাছ, কৈলাসহর, শিংশলা, প্রভাপগড়, শিল-  
চর—হাবি ফামেস্তু পুরি তীর্থযাত্রী গিয়া মিললাগাতা নবদ্বীপর সাধুঠাকুরর  
মিলনভূমিত, উপেরন্ত যেতা যেতা শিক্ষা পেয়া আহিলা উতা বারো তানু  
নিজর নিজর অঙলে প্রচার করলা । বত'মানে সমাজর বিভিন্ন অঙলে  
বুঁলিয়া দেখলু যে যেপের যেপের যেতা যেতা সং মার্গ আছে উতা  
হাবি আহেছেতা সাধুঠাকুরর শিক্ষাদীক্ষাত, সাধুঠাকুরর শূদ্র পবিত্র হিম-  
গিরিত—হাবি ধর্ম'নদীর উ'ভব । যেপের বুনো ধর্মীয় ব্যভিচার বা দুর্নীতি  
দেখতাঙাই, উপের হারপেইবাঙ যে সাধুঠাকুরর প্রভাব না পড়েছে । তবে  
ক্রমশঃ সাধুঠাকুরর ভাবধারা বিকুঁপ্রয়া সমাজর হাবি কুণে কাঙেলেদে  
হমার । এ হেন মহাপুরুষ, পবিত্র প্রাণ, মহাপ্রেমিক মহান সন্ন্যাসী  
সাধুঠাকুরর ককুনালো এ সমাজর হাবি সংকীর্ণতা মিলনতা দূরেই অক,  
উহান আজ জন্মদিনে মোর প্রার্থনাহান ।

## শ্রীগোকুলানন্দ গীতিস্বামীর জীবন-দর্শন

কর্মের ভিতরেদে মানু আগোর জীবন-দর্শন আত্মপ্রকাশ করে।  
 মানু আগোর কিহান খালকরের, কিসাদে খালকরের, উহানর অভি-  
 ব্যক্তি অরতা—তার কর্ম, তার আচরণ, তার কথাবার্তার মাধ্যমে।  
 কবি বা লেখক আগোরতাউ তার জীবন-দর্শন প্রতিফলিত অরতা—  
 তার কাব্যরূপ-কর্মের মাধ্যমে, তার কবিতার লেখার মাধ্যমে। অনু-  
 রূপভাবে শ্রীগোকুলানন্দ গীতিস্বামীর জীবন-দর্শনো প্রকাশ পারতা—  
 তার লেখার মাধ্যমে, তার রচনার মাধ্যমে, তার এলার মাধ্যমে। গীতি-  
 স্বামী গিরকর রচনা উতারে প্রধানতঃ তিনহান ভাগে ভাগ করে  
 পারিয়ার—(১) সামাজিক সংস্কারমূলক বা সমাজ-জাগরণী, (২) পদাবলী  
 কীর্তন বারো (৩) অন্যান্য কবিতাবলী। সামাজিক সংস্কারমূলক  
 রচনার মাঝে অইলত্রয়—‘মাতৃমঙ্গল-গীতিভিনয়’ বারো ‘সমাজ-সংস্কার’  
 —নাটক দুহান মি আগে কুনো কুনো ভাষণে বারো প্রবন্ধত  
 গীতিস্বামী গিরকর ‘বেনামী নাটক আহান’ বুলিয়া উল্লেখ করেছু  
 উহান এ ‘সমাজ-সংস্কার’—নাটক এহান বুলিয়া গিরকর আত্মজীবনী  
 এ অংশ এহানিত্ত পরিষ্কার অইল—“সমাজ-সংস্কার আর মাতৃমঙ্গল  
 নাম। মোহিনী-বেশ, মান, মাথুর আর কীর্তন ॥” এ নাটক ছায়-  
 হানির বাহিরে বিচ্ছিন্নভাবে লেওকরা সমাজ-জাগরণী এলা কতোহানো  
 আছে। পদাবলী কীর্তনের ভিতরে অইলতায় বাসক, নোকা-বিলাস,  
 মোহিনী বেশ, মান, মাথুর ইত্যাদি পালা-কীর্তন, নিত্য রসকীর্তন  
 নীতি এবং বিচ্ছিন্নভাবে লেওকরা ধর্মীয় এলা থানি। অন্যান্য কবিতা-  
 বলীর মাঝে পেয়ারতায়—‘ইমা,’ ‘বাবা,’ ‘বেয়ক-বনক,’ ‘নিজর ঘরগো,’  
 ‘সংসঙ্গ,’ ‘হবানেই মানুর,’ ‘আকতা অনি,’ ‘পরার কথা,’ ‘কল-  
 লামানি,’ ‘লেইরিক তামকরানি,’ তাপকো-লায়লায়,’ ‘বিহাছি মাটীহান,’

‘নিজর গাঙান,’ ‘বিয়ান,’ বরিশা, ‘আলদুবা’ ইত্যাদি কবিতা ।

আজিকার আলোচনার বিষয়হান অইলতায়—গিরকর এ বিভিন্নমুখ রচনার মাধ্যমে তার কি স্বরূপহান প্রকাশ পাছে, গিরকে জীবনে কিহান পানা মনাছে, জীবনে কিহান প্রচার করানি মনাছে—উহান । কথা আকহানাত গিরকর পরিচয়হান মাতিক বুললে—তা বিষ্ণুপ্রিয়া মণিপুরী সমাজ জাগরণর বৈতালিকগো । গিরকে অন্যান্য উন্নত জাতর লগে বিষ্ণুপ্রিয়া মণিপুরীর তুলনা করিয়া এ জাতর পশ্চাৎপদ অয়া থানার কারণ বিহারতে বিহারতে লেপ করেছে—শিক্ষার অভাব বারো পরর অনুকরণ—এ ছায়হানিয়েই এ জাতর পিছে পড়িয়া থানার প্রধান কারণহানি, গিরকে আত্মজীবনীত মতিয়া গেছেগা—শিক্ষার অভাব আর পরানুকরণ । এ দুটিই হল এই জাতর পতন ॥ গিরকে তার জীবনে উদাহরণ দিয়া মাতেছে যে, আকখুরুন তার আকখুলী জিন-করে অন্য জাতর বেশে সাজেয়া ট্রেইনে যিতেগা অন্য জাতর মানুহে বিষ্ণুপ্রিয়া জাতরে পরানুকরণশীল বুলিয়া তুচ্ছত ছিল্য ভাবে টেঁরাছিল্য এবং টিটকারী করেছিল্য; উদিনেস্ত তা পরানুকরণ বাদ দেবার সংকল্প নেছেগা ॥ গিরকে তার জীবনে যথার্থভাবে ও সংকল্প উহান থাছে এবং তদনুযায়ী মানুহেও উপদেশ দিয়া গেছেগা—“যার যে আপন কৃষ্টি রক্ষ প্রাণপণ ।” উহানে, যেবাকা আত্মবিস্মৃতি বারো অন্ধতালো জাত এহান নিশিচ্ছ অনার পথে সালাইছিল্য, উবাকা ও আত্মবিস্মৃতি বারো অন্ধতার কহাগোস্ত সমাজ এহানরে নিকালেয়া বহির্জগতর লগে পরিচিত করেদেনা, বারো অন্যান্য জাতর সমান তালে জাত এহানর কাকেই বেলানির চিন্তা তার সমগ্র সত্তারে অধিকার করিয়া বহেছিল । এ উদ্দেশ্যে গীতিরমী গিরকর সমস্ত জীবনর রচনা, তার সমস্ত জীবনর কবিতা, এলা, তার সমস্ত জীবনর ধ্যান, তার সমস্ত জীবনর আহির পানি ।

গিরকর ‘মাত্মঙ্গল-গীতাভিনয়’ নাটকে ইমাইন্দোলর প্রতি তার গভীর শ্রদ্ধা প্রকাশ পার । এ নাটকর পয়লাকার এলা উহানেই

ইমাজাতর প্রতি গিরকর প্রদ্বা বারো প্রীতির গভীরতার দ্যোতিনা করের—

ইমা ইমা তোর মহিমা কিতা মাততু শৌগো মি ।

... ..

ইমা তোর মহিমা বেদেতে অসীমা করুণাক্রুপিণী ইমা তি ।

গয়া-গঙ্গা-কাশী তীর্থ বারাণসী পবিত্র বুলিয়া শাস্ত্রে মাতের ।

এতা হাবিরতা কলঙ্ক আহেতা, ইমা শব্দ অকলঙ্কিনী ॥

... ..

ইমার স্নেহসিদ্ধ, ক্ষুদ্র একবিন্দু হুজানির কাজে বুলিয়া ।

দেশে দেশে গিয়া ইমার গুণখান গেয়া পাগলগের সাদে বুলুদরি ।

এ নাটকে গীতিপ্রামী গিরকে বিষ্ণুপ্রিয়া ইমাইন্দোলর  
অনাদৃত ক্লপ দেখিয়া তানুর যথার্থ মর্যাদা রক্ষারকা, বিষ্ণুপ্রিয়া  
মণিপুরী ইমাইন্দোলরে অন্যান্য উন্নততর জাতর ইমাজাতর সমপর্যায়ত  
কাকরানিরকা প্রচার করে গেছেগা । শক্তিস্বরূপা ইমাজাতর জাগরণ  
নাইলে সমাজর সর্বাঙ্গীন উন্নতি সম্ভব নেই, উহান গিরকে মর্মে মর্মে  
উপলব্ধি করেছে—

ধর্মসভা লাখে লাখে কাণি ভিক্ষা করেই ।

করিয়াও কিতাও সম্মান নেইব নারীর সম্মান যে জাতে নেই ।

ধন-বিদ্যা-উন্নতিরতা উপায় আখান আছে ।

খালকরিয়া চা তানো পাহি, জেলেইর মান যে জাতে আছে ।

এ মাতৃজাতরে যথার্থ সম্মান দেনা নুঝারিয়ার বুলিয়া দৃংথ করিয়া  
গিরকে মাতেছে—

জেলা এতা কি বস্তুখান হার নাপেইয়াতা ।

দেশে পণ্ডিত নেইতা ?

গিরকর এ গভীর অনুভূতি হারপাকুরা সমাজে নেই ; তার সুরে সুর  
মিলেয়া এ মাতৃসঙ্গীত এলা দেকুরা নেই ; উহানে বারো মাতে যারগা—

আমার দেশে মান্দু নেইতা ?

দেশে মান্দু থাইলা অইতে..... ইত্যাদি ।

ইমাইন্দোলর মৰ্যাদার প্রতি উদাসীন মূর্তিয়ার গিরক গাহিরে উদ্দেশ্য  
করিয়া গিরকে আক্ষেপ করের—

নঙধাঙ কয়েত মূরে বাধিয়া মূণ্ডে বইলা মূর্তিয়ার অয়া ।

তানো ইজত হার নাপেইলে কুংগোয় হারপেইতা ?

তুমার দেশে মূক্তার নেইতা ?

ইমাজাতরে উদ্দেশ্য করিয়াও গিরকে আত্মজাগরণরকা মাতিয়া যারগা—

নিজর সম্মান নিজে হারপেই মা, আকগোয়ৌ হার নাপেইলা ।

নিজর মানখান নিজে না থুইলে থুয়া দেনার মান্দু নেইলা ॥

গিরকর নাটক এহানাত—বাজারে গেছেগা মণিপুরী গিথানক আগোরে  
অন্যজাতর দুকানদার আগোর অপমান করলো : উতার পিছে সত্যবাদী  
পাগল আগোয় ইমাজাতর মৰ্যাদা রক্ষারকা প্রচারকার্য্য অকরলো—এ  
ঘটনা এহানেই প্রধান উপজীব্য বিষয়বস্তুহান । এ বিষয়বস্তু এখানর  
পিছনে বাস্তব ঘটনা আখান আছে, এবং ঘটনা উহান ঘটেছিলতাও  
শিলচর শহরে গীতিস্বামীর আহিগোর মূণ্ডে । ঐ ঘটনা উহানে গিরকরে  
নিদাক্রমভাবে পীড়া দেছিল, উহানে তা গাঙে গাঙে বুলিয়া নারীজাতর  
মৰ্যাদা রক্ষারকা প্রচারকার্য্য চালাছিল । সুতরাং নাটক এখানর  
'সত্যবাদী পাগল' উগো গীতিস্বামীর প্রতিরূপকগো । সমাজর প্রতি বক্তব্য  
হাবি নিকুলেছেতা এ 'সত্যবাদী পাগল' এগোর মূখেত্ত এবং এ  
সত্যবাদী পাগলর কথা উতাতেই গীতিস্বামীর চিন্তাধারা হাবি বাস্তব আছে ।

নাটক এহানাত চিরাচরিত সামাজিক প্রথা উতারে চিরসতা বুলিয়া  
ধরিয়া থনা উহান অন্ধতাহান বারো প্রগতির বিরোধীহান বুলিয়া  
গীতিস্বামীয়ে প্রচণ্ডভাবে অক্রমণ করেছে এবং নূতন জগতর নূতন  
ভাবধারালো অগ্রগতির পথেদে চলানিরকা আহ্বান জানাছে—

কুহিবৃতি মৌতুপ বুলিয়া ধরিয়া থইলে নাকরতই ।

সত্যমেতার কুহিখাননো কলিয়ুগে নাচলতই ॥

আগে বাপক—বপা ওতায় মাহু-মাংস খাছিল ।

কুকির সাদে জুরা বাধিয়া কাণে আংঠি লামকরলা ॥

... ..

কালে কালে কালর কথা নাছনানি নাকরের ।

জিগোয় বনখান পুড়ে আনলে কাচার মজায় নাধরের ।

এলা এহানাত গিরকর বৈজ্ঞানিক বারো প্রগতিশীল চিন্তাধারার জাফদার  
প্রমাণ পেয়ার । বস্তুতঃপক্ষে এলা এহানে গীতিস্বামী গিরকরে ঋষিতুল্য  
করেছে ।

মালকগোরে বাজারে দিয়াপেঠেয়া বা অনাচার কাম কক্করোয়া  
নিজে ভদ্রলোক সাজিয়া নিষ্কর্মা অয়া থাইতারা তথাকথিত আধুনিক  
গিরকগাছির বিরুদ্ধে গিরকে প্রচণ্ডভাবে আক্রমণ করে গেছেগা । এসাদে  
গিরকগাছিরে গীতিস্বামী গিরকে আয়ানর বংশধর অর্থাৎ নপুংসক  
বুলিয়া তিরস্কার করেছে এবং তানুর কর্মবিমুখতার প্রতি ধিক্কার দেছে ।  
মালকর প্রতি তানুর অনাদর এবং গৃহিনীর প্রতি প্রেমধিকার উল্লেখ  
করিয়া তানুরে দারুণভাবে কটাক্ষ করিয়া গিরকে মাতের—

বস্তু আখান পেইলে ইমার কাজে বুলিয়া

হপনেদে আকগৌ নিংশিং নাইলা ।

হবা হবা ওতা বাছিয়া পুছিয়া থয়া

হোরিয়করাও সালইলা ॥

... ..

মইলকে জারপেয়া পুতি আখান উরলেউ

তাপ উথলী সাত বুলিয়া কাদিয়া বইলা ।

বুড়ী মালক উগো মরানিরকা অইলেউ

কিমেতা বুলিয়া না আঙকরলা ॥

প্রসঙ্গক্রমে পরান্দকরণশীল, আত্মবিস্মৃত তথাকথিত আধুনিক  
গিরকগাছির প্রতি কটাক্ষ করিয়া গিরকে মাতের—

চিনো এগো কুংগো, হাবিয়ে চিনো এগো কুংগো ।

মিয়াও বুললেউ মিয়াও নাগয় মেরাক—সেরাক দুকাজুবাগো

এপেয় কথা আহান নামাতলে কথাহান পরিষ্কার নাইতই : বর্ত-

মানে ইমাইন্ডোলরে বাজারে না কাকরানির কথা মাতলে প্রাচীন বারো আধুনিক হাবি মানদ্রেট টিটকারি করতায়, হায়হান, কিন্তু যে সময়ত গীতিস্বামীয়ে প্রচার করে গেলগা, ও সময়ত হয়তো এহানর প্রয়োজনীয়তা আহান আছিল। বর্তমানে অন্যান্য জাতে আমারে তুচ্ছতাচ্ছল্য নাকর-  
 তারা, কারণ এবাকা আমি আমার শিক্ষা-দীক্ষা-সাহিত্যকৃষ্টিলো কতো-  
 হান জগতর মুণ্ডে আগদ্বেরা আহিলাও। কিন্তু ও সময় উহানাত অন্যান্য  
 জাতে আমারে সভ্যজাতর ভিতরে গণ্য নাকরলা এবং আমারে হেয়চক্ষো  
 দেখলা। উহানলো, ও সময়ত এসাদে প্রচার আহানর হয়তো প্রয়োজন  
 আছিল। এ সংক্ষেপে মতভেদ থাইলেউ সমাজর সামগ্রিক উন্নতিরকা ইমাই-  
 ন্দোলর জাগরণ আহানর যে আবশ্যকীয়তা আছে, উহান সংক্ষেপে কারো  
 মতভেদ না থাইতই।

গীতিস্বামী গিরক ছন্দা কল্পনা বা আদর্শর স্বর্গত বুলিয়া  
 আছিলগো নাগয়, তার যথার্থ বাস্তবদৃষ্টিও আছিল। ইমাইন্ডোলরে বাজারে  
 কানা নাদলে লগে লগে অর্থনৈতিক সমস্যা আহানো দেহা দেব; উহান  
 গীতিস্বামীর দৃষ্টিত ধরা পরেছে এবং ও অর্থনৈতিক সমস্যা দূরের করা-  
 নিরকা বাস্তবদৃষ্টিলো গিরকে বিষ্ণুপ্রিয়া ইমাইন্ডোলরে লুরি কাটানিরকা  
 বারো পুতি বুনানিরকা অনুরোধ করে গেছেগা—

উপায় বহু আছে চরকা ঘুরাও বসে ছেড়োনা জাতি বাবসা।

দেখবি দুদিন পরে অভাব গেছে দূরে..... ॥ ইত্যাদি।

এ প্রসঙ্গত উল্লেখযোগ্য যে, তৎকালে খাদিশিল্পর প্রচারক ভারতর বাপুজী  
 মহাত্মা গান্ধীয়ে ভারতব্যাপী যে প্রচারকার্য চালাছিল, গীতিস্বামীর কথাত  
 ও ভারতব্যাপী আন্দোলনর প্রভাব আমি স্পষ্ট করে দৌখয়ার।

‘সমাজ-সংস্কার’-নাটকে গীতিস্বামী গিরকে সমাজর অর্থনৈতিক  
 দুরবস্থারকা—সমাজর কর্মবিমুখতা এবং প্রয়োজন বারো সামর্থ্যর অতিরিক্ত  
 ব্যয়বাহুল্যরে দায়ী করেছে—

ধানগূলি পাবেলবাইতায় পাচদিন থাইলায় বুলিয়া।

কুরাও বাসক—খুপাখুচেই বিছারা বিছারিয়া।

পয়সা দুখান পেইবাইতায়তে কীতন আখান হানজেইলায় ।  
 বি-গুরু-মোষ হাবি বেছিয়া ধারর তলে হাবি থাইলায় ॥  
 ব্যয়বাহুল্য বিলাসিতা এতার মাঝে লইকরলে ।  
 খানি আখি মেলতায় বুলতে আরো পাতালে গাড়লে ॥  
 এসাদে কর্ম-বিমুখতা বারো সামর্থ্য-তিরিক্ত ব্যয়বাহুল্যর প্রতি  
 কটাক্ষ করিয়া কর্মর মাধ্যমে অর্থনৈতিক দুরবস্থা দূরের করানিরকা  
 গিরকে মাতের—

আল-মকছি গুরা-পানা দাইল-মশরী খোঁচিতা ।  
 মটর-চানা জিরা-বাখর মৃগ-শাগল খই আন্দ আদা,  
 হাবি খেতিত ফলেরতা,

এতা হাবি খেতিত ফলের আকতাউ নাগর বিলাতি ।

নিজে আলখান ধরিয়াতে করলে কিজাত গিরন্তি ?

রূপা পইছা নেয়ইল বুলিয়া আতে দাতে লামকরলে ।

মণিপুরীর কি অভাবখাও গারিত লাগিয়া হতকরলে ।

... ..

খেইপঙ-হেইনু কম লাগিয়া হইক আর গুরা লাগেই ।

গিরন্তিলো খেইক বুলেতে এখান ছাড়া উপায় নেই ॥

সমাজর কর্ম-বিমুখতার কথা মাততে গিয়া গিরকে বিশেষভাবে  
 তথাকথিত আধুনিক শিক্ষিত, যেতার ঘর-বাড়ীর কাম করানিরে লজ্জা-  
 জনকহান বুলিয়া নিঙকরতারা এবং বিলাসিতা করিয়া সময় কাটেই-  
 তারা, উতার বিরুদ্ধে কটাক্ষ করিয়া মাতের—

আজি-কালির গাবুরাপুরা অনধকপাখান অইলা ।

ষিদ্দা আখান তামকরানি, দশগোর তুনো মাস্তা অনি ।

ওখানতে হাদা নাপেয়া বুলিয়া বাঙিয়া থাইলা ।

গিরন্তির কাম যেতা করয়া সময় নেইতাউ হাবিরে দেখয়া ।

গিরন্তিতে কুরাও করয়া বুলতেউ সাঙ নাইলা ।

কুংগোয়খাও গিরন্তি করিয়া ঘরর জিনিষ খেইলা খুঙিয়া ?

আটর মকছি-তুজা নাইলে চলে নুহাইলা ।

... ..

বিদ্যাখান নেয়নি ওখান হারনাপেইলা । বুলিয়া লাজখান,  
সেঙ্কাও নিকুললা ওতার রাতি নীঙত আইলা ।

নিঙোল—গিখানক—গাছিরেউ কটাক্ষ করিয়া মাতের—

আজি কালির পুরীজেলা—মৌ লাজখান কিহান হারনাপেইলা ।

গঠন—গাঠন—ফিজল করতে কামদুমতে আকবুণে থইলা ।

নিজরভাতে বাকখান নেয়া, পরারতা হাদা পেয়া,

মণিপুরর তলপুতি নাইলে পিদানি নাকরলায় ।

গঠনখানতে হাদাপেয়া, আতহানতে কুরুকনা করিয়া

হুঁচির কামতে পাছরে বেললা যতরখাতো লেইলক আইলায় ।

ছদা সমালোচনা করিয়া গীতিস্বামী গিরকে না লমকরেছে ;

লগে লগে পথো দেখা দেছে । মূনি—ইমাইন্দোল হাবিরে উদ্দেশ্য করিয়া  
গিরকে মাতের—

চেইতা গিরি—গিখানিলকেই, চেইতা হবাকরে চেই ।

নিজর আতর বুনাপুতি কুংগোরখাত পিদিয়া এইলায় ।

আতখান নাজানরাইতা নাগর,

করলে গিদেই হাবি জানতেই ।

... ..

রূপা আখার হুতা লয়া ওখান নিকালিক,

লেইরাপা গিরক, আঙেই—ফেইচম নেয়া কিসাকা

ধরে বয়া থাই লায় ?

... ..

আনা আখার হুতা লয়া, হুতার করে লুরি কাতিয়া,

ইল্লাফি ধরে বুনিয়া লেইরাপার উরিক ।

‘সমাজ—সংস্কার’ নাটকে গীতিস্বামী গিরকে লেইরা—বরার বিষমার বিকুঞ্জে  
আঘাত করিয়া সাম্যবাদের প্রচার করে গেছেগা । ধনী মানুরে কিসদে

দরিদ্র দুঃখ-দুঃখী শার প্রতি উদাসীন থাইতারা, কিসাদে স্বচ্ছন্দে বিলা-  
সিতা করিয়া অর্থব্যয় করতারা, কিসাদে দরিদ্র প্রতিবেশীর প্রতি দরদহীন  
ব্যবহার করতারা এবং তানুর এসাদে ব্যবহারর ফলে কিসাদে সমাজে  
বৈষম্যর সৃষ্টি অর, উতা গীতিস্বামী গিরকে বর্ণনা করে গেছেগা ।  
গিরকে ধনী গোষ্ঠীয়ে ধিক্কার দিয়া মাতের—

নিজর জিপু ও হাজেয়া সালইলে, তোর বেইবুনির জিপুত কিমে করলে ?  
উরবাতা-পিদবাতা নেয়া কুমেইত নাহিলা, কিমেতা বুদিয়া  
না আঙকরলে ।

হনাকুপানো তোর জিলক বুদিয়া সভাত নিলেগা হাজিয়া,  
তোর বেইবুনির জেলাশো ছায়েগো ঘরে থাইলা কাদিয়া ।  
নিজরতা হুদা হারপেইলেতে মান্দু নাগয় ওগো পশু বুললা,  
বিহাছে ওগোরে কাদাত চেপকরিয়া আরতা পেইলে সৌদিলা ।  
লেইরাপার দুখরকা ধনীগোষ্ঠীয়ে দায়ী করিয়া গিরকে মাতের—  
বরাবালার দেশ মেইলা ।

আকতার গজে আকতা নিকালিয়া লেইরাপা হাবি পাতালে গাড়লা ।  
লগে লগে সাম্যবাদর বিনি নিচুলে আহেব গিরকর লেখনীত—

সাকেই-জিপুতে পিদে নুৱারবা ওসাদে পোষাকহান বেলাদে ।  
মুঙেইপা ঘরর নিঙোলে লেইরাপা ঘরে গিয়া নিজরে  
খাপ খোৱা নুৱারতারা ; ফলে ঘরে মনোমালিন্যর সৃষ্টি অর ।  
ও নিঙোল উতারে উদ্দেশ্য করিয়া গিরকে মাতের—

নুৱা জিনার গিদেই-গিরক খালকরিয়া চেইতা চেই ।  
আগোর দুখ আগোর না হারপিলে

হেইমাক অনার কাম নেই ।

পইলা পইলা আধুনিক শিক্ষা পেইলা বিক্ষুপ্রিয়া উতার  
নিজর ভাষা টেৱানি লাভপেইলা এবং বাংলা টেৱানিরে আভিজাত্য  
বুদিয়া নিঙকরলা । পুরানা শিক্ষা পাছিলা উতার বারো মেইতেই

ভাষালো টেটরলে এবং লেইরিকর অর্থ মাতলে গর্ববোধ করল। এ  
দায় ধরণর মানুর অন্য ভাষার প্রতি মোহ বারো নিজর ভাষার প্রতি  
অশ্রদ্ধারকা তানুরে বিক্রার দিয়া মাতের—

কতিউ তলইলাওতা !

ততরানি ওখান পেয়া ঘরে আকতা বারে আকতা ।

এলা দিলেউ মিয়াঙর ঠারনো, লেরিক দিতেউ খাইরতা ।

বিষ্ণুপ্রিয়া-সমাজর দলাদলির প্রথরতা কুনো মানুর দৃষ্টি  
লিতয়া না যারগা এবং এজাত দলাদলি দেখিয়া কুনো বিবেকী  
মানুরেউ মর্মাহত নারা নুব্বরতার। ছোঁথাটো ব্যাপালো  
সমাজে প্রচণ্ড দলাদলির সৃষ্টি করানি এবং সমাজরে খণ্ড বিখণ্ড  
করিয়াও নিজর জিদ মিটানি বা নিজর আধিপত্য বজায় থনায় চেষ্টা  
এহান জাত এহানর টাংখেইশেঙপা লক্ষণ আহান । অতি তুচ্ছ ঘটনা  
আহানাত্ত বিষ্ণুপ্রিয়ার কিসাদে করিয়া ভিতরখোলর পরিবার কতো-  
হানরে সমাজেত্ত বিচ্যুত করেছিল। এবং 'সৈদনামী ডোম'র দলাদলিলো  
সমাজহানরে কিসাদে বিষময় করেছিল। উতা হাবিয়েউ জানি । এনাদে  
দলাদলির স্রষ্টা সদাঁর বা মৃত্তিকারর বিকল্পে গীতিস্বামী গিরকে মাতের—

সরদার নাগয়, দরবারর দৌ মৃত্তিকার বুললাও এতা ।

দুগোয় আগোয় হিঙ ধারেয়া গাঙ পাচকরত করতা ।

বেয়ক দুগোয় কোঁলি লাগলা, দ্ব্যাবারাদে দুগো থাইলা,

বাপক আগোর কর্ম দুখান তানো করোবেইতা ।

গাঙখান ভাগলা, সাকেই খেয়ইলা, বেইবানিও খিনা অইলা,

খালকরিয়া চেই মৃত্তিকার অয়া হবা করলা কুংতা ?

... ..

মাকুপ-সাকেইর প্রেম না থুইলায় দলাদলি করিয়া ।

আগো মরলে আগোয় নাচেইলায় দলাদলির ফলতে এতা ।

বিষ্ণুপ্রিয়ার বিবেকহীনতার আরাক দৃষ্টান্ত আহান-আমার  
সংস্কৃতির ধারক বারো বাহক ইসাঙ্গপা-ঢাকুলার প্রতি মর্যাদা বারো

দরদর অভাব । আমি আমার ইসালপা-ঢাকুলার বিদ্যা উপার্জন, পরি-  
শ্রম বারো অর্থব্যয়র যথাযথ মূল্য বারো সম্মান নাদিয়ার, তানুরে  
উপযুক্ত দক্ষিণা নাদিয়ার । ফলে আমার জাতীয় সংস্কৃতি ক্রমশঃ লুপ্ত  
হয়। যারগা । আমার এ বিচারহীনতার বিরুদ্ধে গীতিস্বামীয়ে তীক্ষ্ণ  
বাক্যবান বর্ণন করে গেছেগা—

বিদ্যা বেলা বেলেই, হাবিয়ে বিদ্যা বেলা বেলেই ।

গৃহস্থিহে জবর করো, মণিপুরীরাঙ বাখালখান নেই ॥

... ..

লেইরাপা আগোয় দাক বারেইতে দাকগো ফারে বেলল ।

দখিনা পেইতে ছি-আনা পেইলো, কিমে করিয়া বিদ্যাখান ।

করতই ?

... ..

শাস্ত্রে মাতের বিদ্যা এতা অর্থকরী নাইলে,

নাঙহান পেইবে, ভাত নাখেইবে, শাস্ত্রের কথা এতা মিছা নেই ।

বিদ্যার মূল্য নেয়ইলেতে বিদ্যা বেলা বেলতায় ।

সময় থাইতে বিচার করিয়া কিখান আখান হাবিয়ে লেপকরেই ।

সময় আখানাত বিষ্ণুপ্রিয়ায় ভিতরে ডাঙর বংশ-হুকুবংশ

বিচার করিয়া আগোর আগোর টুপিত আগোয় নাখেইলা, আগোর

আড়িত আগোয় নাপিলা । এবাকা পেয়াউ ও বিভেদ উতা এ সমা-

জ্ঞেত্ত নাগেছেগা । এসবে রকমর বিভেদ বুদ্ধির বিরুদ্ধে গীতিস্বামী

গিরকে মাতে গেছেগা —

দাঙর হকু কিতা বুলতাঙ হাবিয়ৌ খালকরেই ।

সাককা অয়া খুটা নেইতা দুনিয়াত আকগৌ নেই ।

.... ..

কীর্তনের ভাত খানাত গিয়া পানি বুজলা তঙাল করিয়া,

বহানির পরে ঠেলাঠেলি কারাঙে লিতইলায় ।

.....  
সারের মাথুপে হমেইলে মাঙইল বুলিয়া ভাগিয়া খেললে,  
বাজালাগোত হমেইলেতে প্রাশ্চিত্ত নেই ।  
.....

বাজারে জাত না বিছারলা, সংকীর্তনে জাত বিছারলা ।

আজি-কালি যেসাদে কুনো কুনো আশ্চর্য্য নীলজ্জ তথাকথিত  
শিক্ষিতর কন্যাপক্ষরূপা বা বস্ত্র দাবী করতারা, উসাদে আগে  
কুনো কুনো কন্যাপক্ষর বরপক্ষরূপা জনার চল আহান আছিল ।  
গীতিস্বামী গিরকে উত্তার বিকক্ষে মাতে গেছেগা—

দানহান নাগর ডাকাতিহান বরগোরাংতো রূপা লনি ।

লক্ষণীয় যে, ‘মাতৃমঙ্গল-গীতাভিন’র সাদে ‘সমাজ সংস্কার’  
নাটকেও সমাজর প্রতি বক্তবা হাবি নিকুনেছেতা ‘সত্যবাণী পাগল’র মূখেত ।

বিচ্ছিন্নভাবে লেঙকরা সামাজিক এলার ভিতরে সাধারণতঃ সমাজের  
বিভেদ দূরের করানি এবং অগ্রগতির পথে সমাজের উৎসাহ ও  
অভয়বাণী হ্রাসবাহিনী গীতিস্বামীর প্রধান লক্ষ্যহান । মাদইগাঙ রাজারগাঙ  
—এ দ্বাতার বিভেদ দূরের করানিত গীতিস্বামীর এলা সমাজের প্রচুর  
উৎসাহ যুগাছে—

উঠো উঠো রাজার-গাঙ, উঠো উঠো মাদই-গাঙ

আরতা কতি ঘুমজিয়া থাইতেই ?  
.....

দলদলি বেলা বেলেই হাবিরে কল্লাকলি করেই

নাইলে আমি মানুরমা নেয়ইলাঙ ।

রাজার-গাঙ মাদইগাঙ যেতা বাপক আকগোর জিপুত এতা  
তঙাল বুলিয়া জাত না বিছারেই ।  
.....

রাজার-গাঙ মাদই-গাঙ বেলেই, হাবিরে বিকুপ্রিয়া বুলে,

আমি হাবি কদ্রিয় সন্তান ।

জাতি-হিংসা বেলা বেলেই, নিঙোল আঙনা- আঙনি করেই

আকতা অনির এহান উপায়হান ।

সত্যবাদী গীতিস্বামীয়ে মাদই-গাঙ রাজার-গাঙর বিভেদ দূরেয়  
করানির একমাত্র উপায়হান মাতে গেছেগা—দ্বাতার ভিতরে বিবাহ-সম্বন্ধ  
চালানি । দুঃখর বিয়হান—দ্বাতা এক এক বুলিয়া হাবিয়েউ সভাত  
চীকারি দিয়ার, কিন্তু আজি পেয়াউ দ্বাতার ভিতরে বিবাহাদিসম্বন্ধ  
চলেয়া দ্বাতার সম্পূর্ণ অভিন্ন অনা নুধারেছি । আরাক উল্লেখযোগ্য  
বিষয় আহান—গীতিস্বামী গিরকর লেখার ভিতরেউ রাজার গাঙ বারো  
মাদইগাঙ উপভাষার সমান হারে সংমিশ্রণ দেহিয়ার । এবং এহানেই  
আমার আদর্শ ভাষাহান অনা লাগতই—কথা এহান যেন হাবি লেখ-  
কর মনে থার ; নাইলে আমারতা নানা সমস্যার সম্মুখীন অনা  
লাগতই ।

বিষ্ণুপ্রিয়া মণিপুরীর ঘুম ভাগেদিয়া পৃথিবীর মূণ্ডে তানদুরে  
নিকালানিরকা গীতিস্বামী গিরকর লেখনীত নিকুলেছে সঞ্জীবনী এলা ।  
উত্তার অংশ কতোহান উল্লেখ করিক—

(১) কাল-সাগরে ভাহিল বারো বিষ্ণুপ্রিয়ার নৌ

সালুইল, চড়েই বিষ্ণুপ্রিয়ার কাটিয়া দুঃখর ডেউ ।

ডর নেই ডর নেই, চৌকাটিয়া সালুইল নৌগো,

ধরাকো চড়েই ।

(২) অজ্ঞান-আধারেয়া ঘুমিতায় কতি ?

উঠো আজি হাবিহান, জ্বালিয়া চেই জ্ঞানর বাতি ।

(৩) উঠো ক্ষত্রিয়-সন্তান, সলকরো জয় ভগবান,

বিষ্ণুকৃপা বোহানে ককইল আকতা নানির মেঘলাহান ।

(৪) বর দেই বর দেই গিরিগিথানি,

আজিতো অকরিক ইমার সম্মান রক্ষা করানি ।

.....

ধন, বিদ্যা, সম্মান বারো হাবিয়ে আকতা অনি,

এ চারিহান নায়া নাইব দুখের রাত পোহানি ।

এ জাত এহানরে জাগানির আকুল আকাঙক্ষা ফুটিয়া উঠেছে  
তার পিপাসিত লেখনীত—

বারা বুলিয়া বুলিয়া হাবিয়ে থাইলাও ঘুমজিয়া,  
গোকুল কোঁৱায় বাছা নুৱারিয়া 'কা' 'কা' বুলিয়া রহানি  
লগে লগে তার আশার বাণী হুনিয়ার—

কোঁৱায় রৌনি অকরলেতে দিল নাইল রাত পোহানি ।

অদ্ভুত হৃদয়স্পর্শী—কবিগিরকর আকাঙক্ষা অটল বিশ্বাস বারো আশার  
বাণী, অদ্রাস্ত—‘সত্যবাদী পাগল’র ভবিষ্যৎ বাণী । গিরকর কালা-  
চিংখেইর এলাত যে দিনহানর আগমনীর সূর বাজিয়া উঠেছে, আজি  
ও দিন উহান পালো আহের । কিন্তু গিরকে জীবদ্ধশায় উতা  
দেখে নুৱারিয়া গেলগা । কবি গিরকর অটল বিশ্বাস—তার কল্পিত  
নুওইগা দিন উহান আকদিন আহিতই, কিন্তু নিজেউ হারপাছিল,  
ও দিন উহান তা দেখে নুৱারতই । উহানলো আকুল আকাঙক্ষা  
করিয়া তা যেন মাতিয়া গেছেগা—হে বিষ্ণুপ্রিয়া, যেদিন তুমি মোর  
এ কল্পিত আনন্দ স্বর্গ উহান আশ্বাদন করতায়, উদিন মোরকা  
আকতা নাকরেদিলেউ মোরে আকখুঝুম নিঃশিঃ গয়ো—

ভাগ্যানক্ষী পেইলে হাবিয়ে বাটিয়া খেইলে

গোকুলরে না থয়ো চৌস্বেয়া ।

গীতিস্বামীয়ে অনেক পদাবলী ইকরে গেছেগা এবং উতা এলা  
দিয়া গাঙে গাঙে বুলেছে । উতার মাঝে তার গভীর ভগবদ্ভক্তি বারো  
ঈশ্বর-প্রেমর অনুভূতির আভাস পেল্লার । কিন্তু তা চণ্ডিদাস—বিদ্যাপতির  
সাদে প্রেমিক ভক্তগো নাগয়—রাধাকৃষ্ণর প্রেমরসে বিভোলাগো নাগয় ।  
রাধাকৃষ্ণর অলৌকিক প্রেমরস আশ্বাদন করান বারো ও প্রেমর বাণী  
প্রচার করানি উহান তার জীবনর উদ্দেশ্যহান নাগয় । তার উদ্দেশ্যহান—এ  
বিষ্ণুপ্রিয়া জাত এহানরে দেহানি যে ও রাধাকৃষ্ণর প্রেমলীলা উতাউ বিষ্ণু-  
প্রিয়া মণিপুরী ভাষালো প্রকাশ করে পারিয়ার ; তার উদ্দেশ্যহান —

বিষ্ণুপ্রসাদ ধর্ম—সংস্কৃতি হাবি নিজর মাতৃভাষার মাধ্যমে প্রকাশ করানি, মাতৃভাষার মাধ্যমে আব্দান করানি । মাতানি বাহুল্য, বিষ্ণুপ্রসাদের আব্দাগোপনে সচেষ্ট জাত পৃথিবীত আরাক অহান আছি কিনা সন্দেহ । নিজর ভাষা-কৃষ্টিলো বহির্জগতে নিজর পরিচয় দেনা উহান পৃথিবীর হাবি সভ্য জাতর ধারাহান, কিন্তু বিষ্ণুপ্রসাদ উল্টা, এ জাতর প্রচেষ্টাহান অইলতার নিজর ভাষাকৃষ্টিরে যথাসম্ভব গোপন করিয়া অন্যজাতর মান্দু মালনি । এ লক্ষণ এহান এবাকাত বিষ্ণুপ্রসাদের শিক্ষিত সমাজে আছে, কিন্তু গীতিস্বামী গিরকর যুগ উহানাত এ মনোবৃত্তি এহান প্রচণ্ড আকার ধারণ করেছিল । আকসময়ত বাঙালীয়ে যেমদে পাশ্চাত্য-শিক্ষা পেয়া সাহেবিয়ানা অনুকরণ করানিত ব্যস্ত আছিল, উমদে বিষ্ণুপ্রসাদের শিক্ষিত সমাজ খাঙচেং বাধিয়া বাঙালী মালোনিরকা উম্মাদ অছিল, পুরাণা গিরগিঞ্চানিয়ে বারো মেইতেই মালনিরকা গইগো অছিল । ও সময় উহানাত অন্যান্য সভ্যজাতর মুণ্ডে নিজর মাতৃভাষাহান টেঁরতে কুনো বিষ্ণুপ্রসাদ শিক্ষিত আগোর লাজ নাপেইতে না দেখেছি, শিক্ষিত বা অশিক্ষিত কুনো বিষ্ণুপ্রসাদ আগোর মতৃভাষালো চিঠি ইকরতে বা ইককরেইতে না দেখেছি ; এলা-কীতান দেনাতে দূরেইর কথা । এ নিমজ্জ জাত এহানর বর্ণনা দিতে ভাষা নিস্তব্ধ অর । জাত এহান এমদে নিশ্চই অনার পথে সালোছিল । সময় উহানাত গীতিস্বামী গিরকে নুঁরা আশার, নুঁরা সম্ভাবনার বাণী আমার ঘরে ঘরে প্রচার করিয়া বুললো । তা দেখাদিলো যে, এ ভাষা এহানর ভিতরে বিরাট সম্ভাবনা আহান আছে, এ ভাষালো সাহিত্য অনা ঝাকরের, রসসৃষ্টি অনা পারের ।

ঠিক এসাদে করে, গীতিস্বামী গিরকে অনেক কবিতা ইকরেছে । কিন্তু কালিদাস-ভবভূতির সাদে, রবীন্দ্রনাথর সাদে কাব্যর রসাব্দান করানি উহান তার জীবনর উদ্দেশ্যাহান নাগয় । কবির জীবনর উদ্দেশ্যাহান—এ বিশ্বব্রহ্মাণ্ডত বারো মানুর হৃদিত যে সত্য-জ্ঞান-আনন্দর ধারা বহের, রসস্বরূপ পরমসত্যর যে নির্মল নিজারা

বহের, ও প্রেমের, ও রসের অনুভূতি বারো ও অনুভূতির বর্ণনা  
 দিয়া মানুসে আনন্দ দেনা । রসজ্ঞের মাতে গেহিগা—“দর্শনাদ্ বর্ণনাত্তাৎ  
 ক্লৃতা লোকে কবিশ্রুতিঃ”—দর্শন বরো বর্ণনা—এহানিই কবির কর্ম-  
 হানি । কিন্তু গীতিস্বামী গিরকরতা অন্যান্য কবির সাদে রস বা  
 প্রেম আস্বাদনের অবসর নেই । এ সমাজের অস্থিতার—সংকীর্ণতার  
 যে নিদাক্ষণ ছবিহান তার হৃদিগোত দিনরাতি জাগিয়া আছিল,  
 উহানে তার হৃদিগোত রসাস্বাদনের ফাম না থাচ্ছে । গীতিস্বামী  
 নীতিবাদীগো, তার কবিতাত তার নৈতিক চিস্তার প্রকাশ পাছে,  
 কিন্তু দূর্নীতি দূরেই করিয়া বারো ন্যায়নীতির প্রতিষ্ঠা করিয়া এ  
 বিশ্বজগতে পবিত্র স্বর্গভূমি হওকরানির পরিকল্পনাহান তারতা নেই :  
 তার দৃষ্টিহান—বিষ্ণুপ্রিয়া মানুস গজে । বিষ্ণুপ্রিয়া সমাজের জিপুতর  
 ভিতরে ইমা-বাবার প্রতি শ্রদ্ধার উন্মেষ করে দেনা, বেইবুনি-বেয়াপার  
 ভিতরে মধুর প্রীতিসম্পর্ক গড়ে তুলেদেনা, দলদলির বিষাক্ততার  
 জর্জরিত বিষ্ণুপ্রিয়া জাতরে অন্ধকূপেত্ত নিকালেয়া বহিজগতর মিঙাল  
 দেখুৱানি, সমাজে ন্যায়নীতি বারো ঐক্যর প্রতিষ্ঠা করানি—উহানেই  
 তার জীবনের আদর্শ হান ।

এ উদ্দেশ্যে গীতিস্বামী গিরকে ‘ইমা’—কবিতাত ইমার অসীম  
 স্নেহ-মমতার বর্ণনা করেছে ‘বাবা’—কবিতাত পিতৃদেবর গুণগান করেছে,  
 ‘বেয়ক-বনক’—কবিতাত বেয়ক-বনকর প্রীতির মহত্ত্ব দেখাছে, ‘হবানেই  
 মানুস’—কবিতাত হবানেই মানুসর প্রতি আস্থা থনার বিপদ দেখাছে,  
 ‘পরার কথা’—কবিতাত নিজর বিচার-বুদ্ধি বেলেয়া অন্যর কথালো  
 চলানির বিপদ দেখাছে, ‘কল-লামানি’—কবিতাত নিরাশ নায়া ডর  
 নাপেয়া কতব্য পথে আগুৱানিরকা মাতেছে, ‘তাপকো—লায় লায়’  
 কবিতাত দৃঢ় বিশ্বাস বারো সংকল্পলো ধীরে ধীরে অগ্রগতির পথে  
 চলানিরকা মাতেছে—

হে পথিক, নিরাশ নায়া, লায় লায় আট,  
 মন্তের সাধন শরীর পতন—উবা দ্বাহানাত ।

এসাদে : 'নুসারতো'—কবিতাত আত্মবিশ্বাসলো মূড়েদে আগুবেয়া থানা-  
রকা মাতেছে, 'লৈইরিক-ভাগকরানি'—কবিতাত আত্মত্যাগ করিয়া পরর  
উদ্দেশ্যে জীবন দান করানিতেই জীবনর সার্থকতাহান বুলিয়া মাতেছে,  
'বিহাছি মাটিহান'—কবিতাত স্বদেশপ্ৰীতির মহত্ত্ব দেহাছে ।

অবশ্যই 'নিজর ঘর', 'নিজর গাঙহান', 'বরিষা', 'বিয়ান',  
'আলুয়া' ইত্যাদি কবিতাত বর্ণনার প্রাধান্য উ দেখিয়ার : কিন্তু উতাউ  
গিরকে প্রাকৃতিক সৌন্দর্য্যত বিভোলা অয়া ইকরেহেতা নাগয়, ইকরে-  
ছেতা সমাজর, বিষ্ণুপ্রিয়া মণিপুরী সাহিত্যর প্রয়োজনে ।

এসাদে করিয়া গীতিস্বামী গিরকর পদাবলীয়া বুলিক, কবি-  
তাউ বুলিক, হাবিতার ভিতরে গিরকর আশা আকহান বাণী আকহান-  
এলা অকহান—'হে বিষ্ণুপ্রিয়া, উঠা, পৃথিবীর উষ্মততর জাতর লগে  
সমান অয় ।' কিন্তু অন্ধ বিষ্ণুপ্রিয়া সমাজে তার ঐ বেদনা, তার ঐ  
আশা-আকাঙ্ক্ষার কতিহান গভীরতা হার নাপেইলা । তারে উন্মাদগো,  
প্রলাপকারীগো বুলিয়া নিঙকরলা । উহানলো গিরকে নিজর কথা  
উতারে 'সত্যবাদী পাগল'র কথা বুলিয়া ব্যক্ত করেছে । অবশ্যই, যে  
গিরিগিথানিয়ে সমাজে নূতন চিন্তাধারা আনানি মনেইতারা, যেতা  
সত্যবাদী, উতা চিরকালই পাগল বুলিয়া পরিচিত অইতারা—সমাজে  
নিন্দিত অইতারা, তানু পিঙ্গাচিতারা অলঙ্কার উতার গজে কালিমা  
আরোপ করতারা । এ প্রসঙ্গত মোর লেঙকরা এলা টুংকারা আহান  
হুনানি মনেইল—

এ জ্বালাল কথা কারে মাততু আর,

এ জীবনে আর কতোদিন বাকী,

না জানু তোর এ বণ্ডনার ।

কাতকরা ডহা হৃদিগোত মোর

নাদলে পরশ আকদিন তোর

কপট আহিয়া উড়া বেলাদিলে

পিদাদেছু যেতা অলঙ্কার ।

গীতিস্বামীয়ে এলা দিয়া তার বাণী প্রচার করতে কুনো কুনো  
ফামে এলা দেনার হাদিত বন্ধ করেছি, কুনো কুনো সভাত উদ্ধত  
যুবকে মৃগামৃগি অপমান করেছি ; গীতিস্বামী গিরকে মুরগো নড়েয়া  
আহির পানি বেলেয়া বহেছে । তার ও আহির পানির বার্থতা তারে  
মর্মান্বিত করেছিল ; তা এলা দিয়া গেছেগা—

কার কাজে কাদুরিতা আকগরৌ হার নাপেইলা ।

হবার কাজে মাভেগাতে আরাক আহান নিঙকরলা ॥

ব্যথিত গীতিস্বামী শেষ জীবনে সামাজিক-সংস্কারর কামেত্ত দুরেই অয়া  
থাইল এবং সাম্যবাদলো রাজনীতির ক্ষেত্রেত হমেইল । গিরকে আত্ম-  
জীবনীত মাতিয়া গেছেগা—

কেহ হল বাদী কেহ বা বিবাদী ।

পূর্ণমনোরথ মোর নাহি হল সিদ্ধি ।

অতঃপর গণ্ডীহীন সমাজ গড়িতে ।

আরম্ভ করিনু আমি পঞ্চাশ ইংরাজীতে ।

সে অবধি সাম্যবাদ করি প্রচারণ ।

সবাকার হিতে মোর সদা প্রাণ পণ ॥

এসাদে গীতিস্বামী গিরকর বার্থতার আহির পানি তার অক্ষরে অক্ষরে  
ফাটিয়া পড়েছে উহান দেহিয়া আকদিন গিরকর উদ্দেশ্যে মি এলা  
আহানি ইকরেছিল । উহানর অংশ আহান হুনেইঙ—

মুণ্ডে ষাতুরাজ আহের বুলিয়া

যে এলা দেছিলে বাছা নুরারিয়া

বোঁঅর ইথাকে বাহিয়া বাহিয়া ঘরে ঘরে ফোঁঅছিল ।

ঘুমে আতুরর বন্ধ দুরারে

ফিরেছিল তের বাণী বারে বারে

কনাকর কাচা হাদিগোত মোর হাতে হাতে শকছিল ।

মহান্ হাদির রেখাহান তোর

আতুর কাদাত পেয়া আজি মোর

দেখলু কিসাদে বানালো আমারে হৃদিগোত থুঁরাছিলে ।

মেরাকে মেরাকে ডহা হৃদিগোর

যেতা যেতা চিন পড়ে আছে তোর

ককর আজি এ আহির পানির পূজাহান লুঁরাবিলে

আজি আমার শ্রদ্ধার আহির পানিলো, গীতিস্বামী

গিরকর বেদনার আহির পানি উতা ধরা-মুঁছিয়া যাকগা ।

লম্বইতেগা দৃঢ়ভাবে মাতে পারিয়ার—গীতিস্বামী গিরকর হপন, আহির পানি বার্থ নাগেহেগা, গিরকর প্রচেষ্টা নিষ্ফল নাছে । গিরকর জীবদ্দশাতেই বিষ্ণুপ্রিয়া ভাষা-সাহিত্যর আন্দোলন আরম্ভ অছিল, আজিও আন্দোলন চলের এবং অচিরেই গিরকর হপনহান সফল অইতই । যে ‘রাতি পোহানি’-হান ‘বাছা নুঁরাবিয়া’ গীতিস্বামী গিরকে কালার্চিৎথেইত্ত জাগরণী এলা অকরেছিল, ও ‘রাতি পোহানি’, ও দিন উহান অছিল । গিরকর ‘ভাগ্য লক্ষ্মী’র আগমনীর এলা আজি আমা-রাও আহের : যে ‘ভাগ্যলক্ষ্মী পেইলে হাবিয়ে বাটিয়া থেইলে গোকুলরে না ধরো চোরোয়া’ বলিয়া গিরকে আকুল আকাঙ্ক্ষা করিয়া গেছেগা, ও ‘ভাগ্যলক্ষ্মী’র আগমনর নুপুর্ ধ্বনি আমার কাণে আহের—তেইর আগমনীর আনন্দ আমার হৃদয়-বীণাত বাজিয়া উঠের । ও এলা, ও আনন্দ—আমার সাহিত্য, আমার কাব্য, আমার এলা—এতাই আজি গীতিস্বামীর পূজার উপচার ।



সংস্কৃতি

1712

## বিষ্ণুপ্রিয়া মণিপুরি সংস্কৃতি

‘সংস্কৃতি’-শব্দর ব্যুৎপত্তি অছেতা—সংস্কৃত ‘সম্’-পূর্বক ‘কৃ’-  
ধাতুত, এবং এ শব্দর অর্থহান অইলতায় সংস্করণ বা refinement ।  
আমার জৈবিক জীবনধারার সংস্কার সাধন করিয়া উত্তর ভিতরেত  
সুন্দর বা রুচিজনক রূপ আহান নিকালানি উহানরেই সংস্কৃতি  
বুলতারা ।

সংস্কৃতির দিক দুহান আছে : আহান—মানসিক বা আন্তর,  
আরাক আহান—তার বাহ্য প্রকাশ । আন্তর বা মানসিক কাঠাম উহানে  
বিশেষ সমাজ বা জাত আহানর বাহ্য সংস্কৃতির রূপ নির্ধারণ করেততা ।  
তবে মানুৰ আন্তর দিক উহান আমার আখিত পরিষ্কার করে ধরা  
না পড়ের ; আমার আখিত পড়েরতা—মানুৰ বাহ্য দিক উহান ।  
উহাননো স্থূল অর্থত আমি সংস্কৃতি বুলতে মানুৰ বাহ্য দিক  
উহানরেই হারপেয়ার । এ বাহ্য সংস্কৃতিরেউ দ্বিভাগে ভাগ করে  
পারিয়ার—আকতা বৌদ্ধিক বা বুদ্ধিজ্ঞান, আরাক থাকতা ঐন্দ্রিয়িক  
বা ইন্দ্রিয়জ্ঞেয় । সাহিত্য, ধর্ম, দর্শন, ন্যায়নীতিবোধ, ব্যবহার—এতা  
বৌদ্ধিক সংস্কৃতি, বারো এলা, নাছা, পোষাক-পরিচ্ছদ, চালচলন—  
এতা ঐন্দ্রিয়িক । আজি আমি সংস্কৃতির এ বাহ্যতম অর্থাৎ নৃত্যগীত,  
চালচলন ইত্যাদি সম্বন্ধে খানি আলোচনা করিক ।

যে কুনো সংস্কৃতির মূল বনিয়াদনো অইলতায়—শিক্ষা ।  
এপের ‘শিক্ষা’ বুলতে বুঝেয়ারতা—যৌক্তিক বা বৈজ্ঞানিক চিন্তা-  
ধারারে । এ বৈজ্ঞানিক চিন্তাধারার বিকাশরকা আকবেদে দরকার স্কুল-  
কলেজীয় শিক্ষার ; আরাক আকবেদে দরকার বাস্তবজ্ঞানর । এ বাস্তব  
জ্ঞানরকা বারো দরকার বিভিন্ন সমাজর বা জাতর সমাজব্যবস্থা,

আজি ও বিক্ষুপ্রিয়া সমাজের কৃষ্টির অবস্থাহান কিহান ? ইমা ইন্দোলর বাসকর সাদে লালিতকলা আহান অনেকদিন আগেই মৃত্যু গেলগা । এবাকা কাঁতকর ফাঙনা, আরতি, কীর্তন ইত্যাদির ও আগে-কার বজ্রধ্বনি না হুনিয়ার: মঙ্গল—আরতির ধ্বনিলো আমার কাঁতকর যুম না বাগের । হাবিত্ত শোচনীয় বিষয়হান অইলতায় ডাকুলা বারো ইসালপার ক্রমবর্ধমান অভাব। চেইতে চেইতে দশ বারো বছরর ভিতরে এমন অবস্থাত আহিলাও যে, গাঙ সাত-আটহান বিছারেয়াউ ডাকুলা বা ইসালপা আগো পানা চলইল । কনাক মারলর ভিতরেই এলা-ডাক তামকরেকুরা না দেখিয়ার । অবস্থা এহান চললে আরাক পনরো-কুড়ি বছরর ভিতরে আমার কৃষ্টি এহান হারানিত পড়তাঙাই ।

বিষ্কুপ্রিয়া কৃষ্টির এ দুরবস্থার কারণহান কিহান ?—প্রথমতঃ আমার বিদ্যা এতা অধিকারী নাগই । খৌপুগোয় হাজার হাজার রূপা খরচ করিয়া কীর্তন করে পারের, কিন্তু ডাকুলা-ইসালপারে দক্ষিণা করানির সময়ত খোগো হুদালা অর । ফলে ডাকুলা-আগেয় রোজগার করানিতে দুরেইর কথা, ডাকগো হুকরানির পইছাহানি ও তারতা না নিকুলের । সমাজর বিবেকহীনতা এহানর সংশোধনরকা গীতিস্বামী গিরকে আশ্রয় চেষ্টা করে গেলগা, কিন্তু সমাজে তার কথা না হুদলা । মহাসভাত হাদিহাদিত আলোচনা খানি অইল, কিন্তু কামে কিস্তাউ নাইল । দ্বিতীয়তঃ, পাশ্চাত্য শিক্ষা পানার লগে লগে মানুহর দৃষ্টি বহিমুখী অনায় আমার সংস্কৃতির প্রতি প্রত্যা নেয়ইল । আমার যুবকে আমার কীর্তন-রাস চেয়া আনন্দ নাপেইতারো—উতা হিকানির ইচ্ছাতে দুরেইর কথা । তৃতীয়তঃ, আমার সংস্কৃতির ভিতরে অনেক ক্ষেত্রত অনেক ক্রটি আছে । অনেক সময়ত আমার সাংস্কৃতিক অনুষ্ঠান উচ্চতর রুচির মাপকাঠিলো বা যৌক্তিক দৃষ্টিভঙ্গিলো চেইলে হবা না লাগের । ফলে, আধুনিক শিক্ষিত গিরিগিথানিরতা এ সংস্কৃতির প্রতি অনুরাগ কমে যারগা ।

এ দুদিনে বর্তমান শিক্ষিত সমাজে, বিশেষ করিয়া শিক্ষক

শোণ্ডীর ভিতরে নিজের সংস্কৃতির প্রতি অনুরাগ আহান জাগিয়া উঠেছে  
 এহান নিয়াম আনন্দর বিষয়হান । নিজের ভাষা-সাহিত্যর নবজাগরণর  
 লগে সংস্কৃতির প্রতি অনুরাগ এহানে আমারঙ ক্ষীণ আশা আহান  
 আনেনেদে যে, অপর ভবিষ্যতে হয়তো আমি বা'রো নিজের সংস্কৃ-  
 তিরে পুনরুজ্জীবিত করিয়া তুলে পারতাঙাই । আমার শিক্ষিত যুবক  
 গিরিগিথানিয়ে তানুর দৈনন্দিন কর্ম বা বাবসারর বাহিরেউ আমার  
 সংস্কৃতির পরিপেষণ করাত মনোযোগ দেনা পারতারা । আগেকার  
 আমার অজ্ঞা গিরকগাছিয়েউ হুদ্রা সংস্কৃতিলো না থাছিলো ; তানুর  
 দৈনন্দিন কৃষিকর্মাদি রীতিমত করিয়াউ তানু সাংস্কৃতিক চর্চা করে-  
 ছিলোতা । সুতরাং দৈনন্দিন কর্মর বাহিরেউ সাংস্কৃতিক চর্চা থনা  
 উহান অসম্ভাব্য আহান নাগই । এতার লগে লগে সমাজর দায়িত্ব  
 আহানো আছে : আমার সাংস্কৃতিক বিদ্যা এতা যাতে অর্থকরী অর  
 —এ বিদ্যালো যাতে কুনোগোয় সংসার চালেয়া যানা পারতারা, উবেদে  
 ছা'বিয়ে দৃষ্টি দেনা লাগতই । অধিকন্তু, আমার সংস্কৃতির ভিতরে  
 উন্নততর কুচিত বা বৈজ্ঞানিক দৃষ্টিভঙ্গীত বিসদৃশ অর, উতার সংস্কার  
 লখন করিয়া সহৃদয় সামাজিকর কুচিসম্মত করিয়া তুলানি লাগতই ।

যেতাউ অক, আমার সংস্কৃতির প্রতি যদিও বর্তমানে অনু-  
 রাগ আহানর সৃষ্টি আছে, তথাপি আমার দিক আহান একপ্রকার  
 নষ্ট অয়া হুদেইল । উহান অইলতায় নিঙোল বা ইমা-ইন্দোলর বাসক ।  
 এ সংস্কৃতি এহানর ভিতরে কতিহান মাধুর্য আছে, রসজ্ঞ গিরিগিথা-  
 নিয়ে হারপেইতায় । এহান মাঙো দেলগা এহান অতীব দুঃখর বিষয়-  
 হান । আমার শিক্ষিত নিঙোলগিথানি গাছিয়ে যদি সংস্কৃতি এহানর  
 বারাদে দৃষ্টি দিতারা, উহান অইলে আমার ক্ষতি এহানর পরিপূরণ  
 অইতই ; কারণ এবাকাউ বিদ্যা এহান হারপাকুরা গিরিগিথানি আছি ।  
 ইচ্ছা করলে মেইতেই গিরিগিথানিরাঙতোউ হিকে পারিয়ার ।

সমইভেগা কথা আহান মাতানির নিতান্ত দরকার । মণিপূরে  
 এবং কাছাড়র মেইতেইর ভিতরে বর্তমানে যে ধর্মীয় এবং সাংস্কৃতিক

আলোড়নহান চলেছে, এহানাত অনুমান করানি অসম্ভব নাগই যে আহের পনরো-কুড়ি বছরর ভিতরে আমার বৈষ্ণবধর্মমূলক সংস্কৃতি মণিপুর এবং কাছাড়র মেইতেইরাঙতো মৃতো যিতইগা। এমন কি, ‘মণিপুরী’ শব্দ এগো পেয়া তানু ব্যবহার না করতায়। সুতরাং যে মণিপুরী সংস্কৃতিলো—যে নৃত্যগীতিলো আমি জগতে পালছি, ও সংস্কৃতির—ও নৃত্যগীতির সংরক্ষণর বিরাট দায়িত্বহান পড়েছেতায় বিষ্ণুপ্রিয়া গজে। মণিপুরী নৃত্যগীতাদি সংস্কৃতিরে জগতর মূণ্ডে উজ্জ্বল করিয়া তুলিয়া থনার বিরাট দায়িত্ব এহান মূণ্ডে থয়া বিষ্ণু-প্রিয়া মণিপুরী নরুয়া যুবক-নিঙোলে মূণ্ডেদে কাকইে দেনা লাগতই।

## বিষ্ণুপ্রিয়া মণিপুরী নৃত্য

বিষ্ণুপ্রিয়া মণিপুরী নৃত্য আলোচনার আগে লোকনৃত্য (folk dance) বারো শাস্ত্রীয় নৃত্য (classical dance) কারে মাততারা, এবং দ্ব্যোতার ভিতরে কিহান পার্থক্য—এহানি হারপানি লাগের।

লোকনৃত্য বুলতারাতায় উতারে, যে নৃত্য মানুর দৈনন্দিন জীবনর কর্মধারা বা আনন্দউদ্দীপনার লগে অঙ্গঙ্গিভাবে জড়িত, অর্থাৎ যে নৃত্যর মাধ্যমে সহজে দৈনন্দিন জীবনর কর্ম, ধারা এবং আনন্দ উদ্দীপনার অভিব্যক্তি অর। এ নৃত্যর তাল বারো মূদ্রা উতাই সহজভাবে মানুরাঙতো নিকুলে আহের। উহানে, এ নৃত্য বা এ নৃত্যর তাল বা মূদ্রা হিকানি মিয়াম কঠিন নেই। লোকনৃত্যর অঙ্গ-চালনা বা মূদ্রায় ও নৃত্যর পশ্চাতে বর্তমান ঘটনার সোজাসুঁজি অভিব্যক্তি করের বুলিয়া লোকনৃত্যর অর্থ বা ভাব হারপেইতে দর্শকরতা মিয়াম অসুবিধা নার। উহানে, লোকনৃত্যর নর্তক-নর্তকী বারো দর্শকর ভিতরে মিয়াম পার্থক্য না থার। লোকনৃত্যর তাল উতাই সহজভাবে মানুর জীবনেও আ হর বুলিয়া উতার ভিতরে কোনো জটিলতা

বা স্ফুট কারুকার্য নেই। ফলে দর্শকে উ রঙ্গমণ্ডর নাছার তালর লগে তালহান ধরানি পারতারা।

শাস্ত্রীয় নৃত্য অইলতায় উতা, যেতা মানুর দৈনন্দিন জীবনর লগে অঙ্গাঙ্গিভাবে জড়িত নাগই, অথচ যেতা মানব-মনর স্ফুটভাব উতারে আকারে—ইঙ্গিতে ফুটেয়া আমার স্ফুট অনুভূতিরে জাগেয়া তুলের, অথবা মনর গজে স্ফুটভাবে ক্রিয়া করিয়া মানুর অন্তরাগার আনন্দ উহানরে অভিব্যক্ত করে। এ নৃত্যর অঙ্গ-চালনা বারো মূদ্রা উতা সহজভাবে জীবনেত্ত নাহের, ঋষিয়ে স্ফুটভাবে খালকরিয়া কিসাদে অঙ্গচালনালো বারো মূদ্রালো ফুটেইলে বিশিষ্ট ভাব আহান সহদয়-সামাজিকর অন্তরে জাগ্রত অর, উহান আবিষ্কার করেছি। ফলে, এ নৃত্য মানুরাও সহজবোধ্য নাগই; এ নৃত্য রীতিমতো শিক্ষা করিয়া আয়ত্ত করানি লাগের। শাস্ত্রীয় নৃত্যর তাল উতাউ দৈনন্দিন জীবনেত্ত সহজভাবে আহেরতা নাগই; উতার ভিতরে স্ফুট কারুকার্য নহে, এবং উতাউ রীতিমতো শিক্ষা নিয়া আয়ত্ত করানি লাগের। শাস্ত্রীয় নৃত্যর স্ফুটরস হাবিরাও বোধগম্য নার, উতা হারপানিরকা রসিক মানু লাগের। এ নাছার তাল উতাউ স্ফুট বুলিয়া অদক্ষ দর্শকে রঙ্গমণ্ডর নাছার তালর লগে তালহান ধরানি নুরারতারা।

লোকনৃত্যতৌ মূদ্রা আছে, শাস্ত্রীয় নৃত্যতৌ মূদ্রা আছে। কিন্তু লোকনৃত্যর মূদ্রা উতা সাধারণ জীবনর লগে সোজাসুজি জড়িত অন্য সহজ বোধ্য; শাস্ত্রীয় নৃত্যর মূদ্রা উতা ঋষির স্ফুট চিন্তাত আবিষ্কৃত অন্য উতা স্ফুট ধ্যানর মাধ্যমে হারপানি লাগের। যেমন, শিকারী আগোয় বল্লমগোলো পশুগো মারতে কিসাদে ভঙ্গীহান করে, কিসাদে কাকেইহান দে, উহান ঔভাবে কুনোগোয় নৃত্যলো ফুটেইলে আমারতা বুজতে অসুবিধা নার; উসাদে নৃত্য উতা লোকনৃত্যত পড়ের কিন্তু 'আতহানর কিসাদে ভঙ্গীহানে মাছগোর ইঙ্গিত দে, কিসাদে ভঙ্গীহানে ভ্রমরগোর ইঙ্গিত দে, উতা যেবাকা স্ফুট কারুকার্য-সম্পন্ন মূদ্রালো প্রকাশ করানি অর, উবাকা ঔ মূদ্রা উতারে শাস্ত্রীয় নৃত্যর অঙ্গ হিসাবে গণ্য করানি অর। শব্দশক্তির লগে তুলনা করলে

মাতানি যাকবের যে, লোকনৃত্যের মূদ্রায় অর্থ উহানরে 'অভিহিত' করেব ; শাস্ত্রীয় নৃত্যের মূদ্রায় অর্থ উহানরে 'ব্যঞ্জিত' করেব ।

লোকনৃত্য বারো শাস্ত্রীয় নৃত্যের তালর ক্ষেত্রতোঁ উসাদে পার্থক্য আছে । লোকনৃত্যের তাল উতা, সংক্ষেপে মাতিক বুজ্জে, 'আসুটা' তাল । উতা অতি সহজবোধ্য ; ফলে কোনো তাল আহান লালো পড়লেগা সাধারণ দর্শকেউ চটকরে ধরে পারতারা । কিন্তু শাস্ত্রীয় নৃত্যের তাল উতা সুক্ষ্ম কারুকার্যময় অন্য সহজবোধ্য নাগই ; কোনো তাল আহানাত গঙগোল অইলে অদক্ষ দর্শকের পক্ষে উহান ধরানি সম্ভব নেই । উহানে, দুব্বারগোয় বা ডাকুলাগোয় নাহতে বা তাল বারেইতে কুস্পের তালহানাত হেপ খার, উহান ঐ বিষয়ে শিক্ষা নাপাছি মানুবে থককরে ধরে নুব্বরতারা ।

শাস্ত্রীয় নৃত্যত হাবিসময়ত অর্থব্যঞ্জক মূদ্রা থানা উহান আব-শ্যিকহান নাগই ; অর্থব্যঞ্জক মূদ্রা না থাইলেউ শাস্ত্রীয় নৃত্য অন্য যাকবের । সুক্ষ্মাতিসুক্ষ্ম কারুকার্যলো বৈচিত্র্যর সৃষ্টি করিয়া যদি কোনো নৃত্যর দর্শকের মনে নির্বাল অনন্দর সৃষ্টি করে পারের, উহান অইলে ঐ নৃত্য উহান শাস্ত্রীয় নৃত্য বুলিয়া গণ্য অইতই । তালর ক্ষেত্রতোঁ কথা এহান প্রযোজ্য । ডাকুলাগোর তাল বারো চলন - উতার অর্থ আমি হার নাপেইলেউ, উতার ভিতরে যে সুক্ষ্ম কারুকার্য আহান আছে, উহানে স্বেতই আমার আনন্দর সঞ্চার করেব । ঐ কারুকার্য উহান আমার সহজ জীবনেও আহেরহান নাগই; উহান রীতিমতো সাধ-নালো হিকানি লাগের । গতিকে, মৃদঙ্গনৃত্যত অর্থসূচক মূদ্রা না থাই-লেউ উতা শাস্ত্রীয় নৃত্যের ভিতরে হমার ।

মাতিক বুজ্জে, অর্থযুক্তমূদ্রাসম্বিষ্ট নৃত্যের গজর শুরু আছেতার অর্থবিহীন অঙ্গচালনাসম্বিষ্ট নৃত্য । এপের ব্যাপারহান অইলতার এহান : মানুর আসল স্বরূপহান অইলতার 'আনন্দ' । অর্থযুক্তমূদ্রা সম্বিষ্ট নৃত্যর মানুর ঐ আনন্দস্বরূপ উহা । জাগ্রত করেব, হারহান, কিন্তু এপথে আগুবেইতে আগুবেইতে শুরু আহানাত গিয়া শিল্পীয়ে দেহের-

তায়, মানুর গভীরতম অন্তরাবার আনন্দের অভিব্যক্তিরকা অর্থযুক্তমুদ্রার দরকার নেই । মানুর আনন্দস্বরূপের গভীর সত্য উপলব্ধি করানির পিছে শিল্পীয়ে দেহের যে, ‘কিয়া, কিগই জানে, অকারণ কারণে’ যেন কুনো কুনো শব্দর বা তালর ঝংকারে, অথবা কুনো কুনো অঙ্গসঞ্চালনে বোধগম্য অর্থ না থাইলেউ, উতায় স্বাভাবিকভাবে মানুর নির্মল আনন্দের অভিব্যক্তি করে; হাবি শব্দ বা তালর ঝংকার বা অঙ্গসঞ্চালনর অর্থ যেন আকহান—‘আনন্দ’ । অর্থবিহীন দিব্য আনন্দের অভিব্যক্তক অর্থবিহীন ঝংকার বারো অঙ্গসঞ্চালনেই শাস্ত্রীয় নৃত্যর চরম পর্যায়-হান । তবে শাস্ত্রীয় নৃত্যত অর্থযুক্ত মুদ্রাউ অঙ্গ, অর্থবিহীন অঙ্গচালনাউ অঙ্গ, উতার নিজস্ব নিয়ম বা রীতি আহান থার, যেহান রীতিমতো সাধনালো হিকানি লাগের । প্রত্যেক নৃত্যর বিশেষ ধারা আহান আগেকার গুরুবে লেপকরিয়া থদেছি; ঔমতে ঔ নৃত্য পরিবেশন করানি লাগের । লোকনৃত্যর শাস্ত্রীয় নৃত্যর পার্থক্যহান এহান ।

এবারে, বিষ্ণুপ্রিয়া মণিপুরী লোকনৃত্য বারো শাস্ত্রীয় নৃত্য সম্বন্ধে আলোচনা করিক ।

আগেই মাতলাঙ যে, লোকনৃত্যর সৃষ্টি অরতা দৈনন্দিন জীবন ধারাত । কিন্তু বিষ্ণুপ্রিয়া মণিপুরীর সাধারণ জীবনে বৈচিত্র্যর অভাব থানায়, এ জাতে লোকনৃত্যরতাউ প্রচণ্ড অভাব । বিষ্ণুপ্রিয়ার জীবন যেসাদে গতানুগতিক ধারা আহানলো চলেছে, তানুর নৃত্যউ উসাদে ধারা আহানলো চলেছে । পারিপার্শ্বিক সমাজে—বিশেষ করিয়া জনজাতির ভিতরে—লোকনৃত্যর প্রাচুর্য দেখলে আমার সমাজর এ প্রচণ্ড অভাব এহানর উপলব্ধি অর । তবে আমরাও লোকনৃত্য একেবারে নেই উহান নাগই ; দুহান-আহান আছে ।

আমার লোকনৃত্যর ভিতরে একমাত্র উল্লেখযোগ্য বারো চমক-প্রদ নৃত্যহান অইলতায় ঢোলনৃত্য । এ নাছা এহান সর্বজন পরিচিত-হান ; উহানে এ নাছা সম্বন্ধে বিস্তৃত আলোচনা না করিক । তবে আজিকালি ঢোলনৃত্যত প্রায়ই শাস্ত্রীয় বা সুন্দর তাল বরেইতারা ;

উহানে তোলনৃত্যর শুদ্ধ লৌকিক দিক উহান ব্যাহত অর ।

আরাক উল্লেখযোগ্য লোকনৃত্য আহান আগে আমরাও  
আছিল । উহান অংশাই কুনো উৎসবে বা মাগুপে অনুষ্ঠান করেছি-  
হান নাগই ; উহান আহিলতার লপুকে । নাছা উহান আইলতার  
'বরণ ডাহানির নাছা' । খরার সময়ত বরণ ডাহানির এলা  
দিয়া আগে ইমাইন্দোলে—মুনিয়ে লপুকে নাছলা । ইমাইন্দোলে  
মুপথঙমেই বারো কলার নৈবেদ্যলো ইন্দ্রদেবরে হুমাদিয়া এলার  
মাধনে নাছে নাছে ইন্দ্রদেবরাও বরণ মাগলা; তানুর চারিমবারাদে  
বারো মুনিয়ে কুরিকর্মর বিভিন্ন অঙ্গর অভিনয় করিয়া নাছলা ।  
মাতিক বুললে বিষ্ণুপ্রিয়া মণিপুরী লোকনৃত্যর আদিম উপাদানহান  
আইলতার এহান । এ নাছা এহানরে আমি মাগুপে বা রঙ্গমণ্ডত দর্শনীর  
করিয়া তুলে নুঝারেছি এহান আমার শিক্ষণীয়নর দুর্বলতাহান । এ  
নাছা স্বরোহানির বাহিরে বিষ্ণুপ্রিয়া লোকনৃত্য নেই বুঝেউ য়াকরের ।

শাস্ত্রীয় নৃত্যর ভিতরে আহেরতার—রাসলীলার অন্তর্গত নৃত্য,  
মুদঙ্গনৃত্য, দুর রনৃত্য ইত্যাদি । এতা সর্বাঙ্গনিবিদিত বুনিয়া এতা সম্বন্ধে  
বিস্তৃত আলোচনা নাকরলাও । শাস্ত্রীয় নৃত্যর মুদ্রা, তাল ইত্যাদি  
সুক্ষ্ম বিষয় সম্বন্ধে আলোচনার দরকার থাইলেউ, উতা সম্বন্ধে  
আজি আলোচনা নাকরলাও; কারণ, বিষ্ণুপ্রিয়া মণিপুরী নৃত্যর সাধারণ  
বা প্রাথমিক আলোচনা করানিই এ প্রবন্ধর উদ্দেশ্যহান ।

বিষ্ণুপ্রিয়া মণিপুরী নৃত্য কতোহানাত লোকনৃত্য বারো শাস্ত্রীয়  
নৃত্যর সন্মিলন ঘটেছে । যেমন খুপাক ইশেইর ভিতরে শাস্ত্রীয় নৃত্যর  
প্রাবান্য থাইলেউ, বারো একমাত্র শাস্ত্রীয় তাল থাইলেউ, নাহার কুনো কুনো  
অঙ্গত লোকনৃত্যর প্রভাব দেহিয়ার । কাঙর পালিত বা তথাকথিত 'জয়দেব'-  
এ এলার লগে আতর তালি দিয়া যে নাছা নাছতারা, উতাত লোকনৃত্যর  
ভাগহানেই মিয়াম; এ নাহার তাল উতাউ অনেকাংশত লোকনৃত্যর অঙ্গ  
হিসাবে গণ্য করানি য়াকরের ।

## বিষ্ণুপ্রিয়া মণিপুরী লোক-সংস্কৃতি

কোনো নিয়ম মার্কিক শিক্ষা ব্যতিরেকে মানুষের দৈনন্দিন জীবনেও স্বাভাবিক এবং সহজ-সরলভাবে যে সংস্কৃতির উদ্ভব হয়, উত্তরে লোকসংস্কৃতি বুলি তারা। অনেকে লোক-সংস্কৃতি এটা প্রাচীন যুগেরই বুলিয়া মাতারা। কিন্তু বস্তুতঃ উহান নাগই; বর্তমান কালেও লোক-সংস্কৃতির উদ্ভব হয়; এবং ভবিষ্যতেও অইতই। কালের লগে লোক-সংস্কৃতির সংস্কৃতি নেই; স্বাভাবিক জীবনেও সহজভাবে উৎপত্তি অন্য উহানেই তাই লক্ষণহীন। লোক-সংস্কৃতির বিভিন্ন দিক আছে—(১) সাহিত্য (কাহিনী, ছড়া, এলা ইত্যাদি), (২) নৃত্য, (৩) বিশ্বাস (দৌ-দুক, নুরারা, নুরারার চিকিৎসা, রহস্য-বিদ্যা, প্রাকৃতিক তত্ত্ব ইত্যাদি সম্পর্কে), (৪) আচার, রীতি (৫) খেলাধুলা, এবং (৬) স্থাপত্য, ভাস্কর্য্য, কলা ইত্যাদি। এতার ভিতরে সাহিত্য বারো নৃত্য সম্পর্কে আগে আলোচনা করোঁছি; এবাকা থাকী উতা সম্বন্ধে আলোচনা করিওঁ।

### ক। দৌ-দুক বিষয়ে বিশ্বাস

দৌ প্রধানতঃ দ্বি-ধরণের—নিম্ন পর্যায়ের দৌ, বারো

উন্নত-পর্যায়ের দৌ। নিম্নপর্যায়ের দৌরে সাধারণতঃ মানুষের অপকার কর-  
তারা বা নুরারার সৃষ্টি করতারা। উন্নত-পর্যায়ের দৌরে মানুষের উপকার কর-  
তারা। তবে নিম্নপর্যায়ের দৌর ভিতরেও অনেক সময় সময়বিশেষে মানুষের উপ-  
কার করতারা। এবং উন্নত পর্যায়ের দৌরেও তানুর প্রতি অশ্রদ্ধা দেহে-  
ইলে মানুষের অপকার করতারা বা নুরারার সৃষ্টি করতারা।

নিম্নপর্যায়ের দৌর ভিতরে নিম্নাং অনিষ্টকারী অইলাতায় এটা—

কালাদৌ—এতা নিজনি ফামে, উকুম ফামে, গাছে বারো ঝোপাত  
থাইতারা, বারো মান্দু অখালাআখুঁল—যিতেগা পেইলে তানুরে ধরতারা।  
কালাদৌরে পেইলে মান্দু মূঁছিত তইতারা, খতাদে কলপুক বেজতারা,  
মরতারা। এতায় হপনেদেউ জেলেইরে চরিত্রশ্রুত করতারা।

লামচিক—মান্দুর অপমৃত্যু অইলে অথবা গারিত রক্ষা—তাবিজ থাইলে  
মরানির পিছে মান্দু উতা জিন বা লামচিক তইতারা। লামচিকে  
মান্দুরে পথে খেতকরিয়া ডর দেহেইতারা, হিন দিতারা। লামচিকে  
ধরলেউ মান্দু খতাদে কলপুক বেলেয়া মূঁছিত অইতারা। লামচিকরে  
'জিন' বুলিয়াউ মাততারা।

লাঙকাপ—এতা পথর লামলাকে বা গাছে থাইতারাতা। দৌ এতা চেইল  
মাহেই দীঘল অইতারা; দীঘল অইতে অইতে চার মান্দু উগোর গজে  
পড়তারা। উহানলো লাঙকাপ দেখলে মুরগো নঙেয়া থানা থকর।

জিন (?) —গারিগোত হবানেই তাবিজ থাইলে পুড়ানির সময়ত গারি  
উগো না পুড়ের, বারো মরাদেহ উগো জিংতা অয়া পানিত পড়া-  
নিরকা চেঁটা করের। উসাদে মৃতদেহ উগো টুকরা টুকরা করে  
কাপিয়া মাটীত গাতানি লাগের। উসাদে মৃতদেহ উগো পানিত পড়িয়া  
বা ধাবদিয়া লিতো পড়লেগাতে উগো মারাত্মক দৌগো অয়া মান্দুর  
প্রচণ্ড অনিষ্ট করের। এসাদে দৌ উতারে জিন (?) বুলতারা।

ভূত-পেরেত—মহাদেবর লগে থাইতারা দৌ। মরাগো পুড়তারা দিন  
উহান রাতি মহাদেবে ভূতপেরেতলো আহিলকো পুরি মৃতদেহ উগো  
শুরা করে নিকালেয়া টুকরা করে করে ভূতপেরেত উতারাঙ বাটেদের;  
ভূতপেরেতে উতা খেইতারা।

ছইতান—নিজনি ফামে থায়া দৌ এতায় মান্দু বুলেইতারা। মূনি ছই-  
তানে জেলেই বুলেয়া তানুর লগে শৌসুমারা তইতারা; জেলেই  
ছইতানে মূনি বুলেয়া তানুর লগে শৌ-সুমারা অইতারা।  
উতা ছাড়া, এমনেউ পথনেই ফামে মান্দুরে পেইলে মুরে খুঁলি  
দিয়া বুলেয়া দিশাহারা করতারা। ছইতানে রাতি লামলাকেদে নিকুলিয়া

বুলতারা বারো খতাত জি নিকালেয়া উত পড়তারা পক উতা খেইতারা ।  
পরী—এতা জেলেই-দৌ । এতায় মুনরে বুলেয়া বুদ্ধিহারা করতারা,  
বারো উতারেলো শৌ-সুমারা অয়া খেইতারা । এতা সাধারণতঃ গাছে  
বারো জঙ্গলে খেইতারা ।

ধলাদৌ—এতা মিরাম অনিষ্টকারী দৌ নাগই । এতায় মানুরে  
হালকাভাবে ডর দেহেইতারা বারো হপনেদে জেলেইরে চরিত্রভ্রষ্ট  
করতারা । কালাদৌর লগে ধলাদৌর বিরোধ আছে । প্রতি কালাদৌর  
লগে ধলাদৌ আঁকেইগো থায়া মানুরে কালাদৌর অপকারেত্ত কাল-  
করতারা ।

ডাইনী—এতা জেলেই-দৌ । এতা সাধারণতঃ গাছর উকুমর তলে বা  
খাল-নালার পারে খেইতারা । মেরাকে নিজর্ন ফামে ইরলপার গত  
হুনিয়ার উতা ডাইনীয়ে রাধরী হৌর গত । ডাইনীর ইরলপার গত  
উহান নুংশি পেয়া হুনলে পেটফুলা নুবারা অর । ডাইনীয়ে ধরলে  
মানুর গারি চিকানা অয়া হুকে হুকে যায়গা ।

মইষানুর—এতা পানির ফামে বা সুরুঙে খেইতারা, বারো মইষর আকারে  
নিকুলিয়া ঘাস খেইতারা । মইষানুরে ধরলে মানু মরতারা, মইষগুরুও  
ছটফট করিয়া মরতারা ।

লামচা—চরেদে শৌ জরমদিয়া মারিয়া বেললে উতায় লামচা—দৌ অয়া  
নিকুলতারা । উতায় মানুরে লাকনা দিতারা । লামচা এতায় সাধারণতঃ  
মেকুর মালয়া নিকুলতারা, বারো মানুর জাঙর হাদিয়েদে লিতনির চেষ্টা  
করতারা । যোগোর জাঙর হাদিয়েদে লামচায় মেকুর অলয়া লিতইতারা,  
উগো বাহা অর অথবা মরের । লামচায় ধরলে ইমা-ইন্দোলে শৌ-  
সুমারা নাইতারা ।

চাকুমর দৌ—চাকুম বা অনাচার বস্তু বেলতারা ফামে দৌ আকতা  
খেইতারা; উতায় ধরলে মানুর—বিশেষ করিয়া কনাকশৌর গারিত ইরেই-  
খঙলেই নুবারা অর, অর্থাৎ গারি চাকা চাকা অয়া ফুলের, বারো  
গারি খাজুরার ।

ববেই—এগো দৌ জেলাগো ; ঘরর গজে থাইরীগো । কনাকশৌর দাত  
ভাগলে উতার ফামে নুৱা দাত দিৱীগো তেই ।

এতা ছাড়া খাল নালাত বিভিন্ন রকমর দৌ আছি, যেতার  
ধরলে ফট, ঘা, পেটকামারা ইত্যাদি নুৱারা দেহা দেৱ । দৌ-জেলেই  
আকতাউ আছি, যেতার মূনিরে হপনেদে চরিত্রপ্রস্তু করতারা । কালো-  
দৌ, ধলাদৌ, লামচিক, লাঙকাপ—এ দৌ এতা সাধারণতঃ নিজনি ফামে  
চিপি চিপি বরণ দিলে, বারোবাজিত, সেক্ষাত বারো রাত নিকুলতারা ।

লামরদৌ/লামলেইমা—লাম আহানাত পইলা মরের মানু উগো  
লাম উহানর গিরকগো বা দৌগো ; বারো, পইলা মরিৱী জেলা উগো  
লাম উহানর গিথানকগো বা লামলেইমাগো । লপুকে দৌৱার সময়ত  
কুনো কিছু খানার আগে লামর দৌ বা লামলেইমাৱে দিয়া খানা  
লাগেৱ । বিষদূর দিনেও উঠানর আগাত বা তিনজুড়া পথে লামরদৌ  
বা লামলেইমাৱে লুক আহান দেনা লাগেৱ ।

ঘর-গিথানী—ঘরর গিথানক দৌজেলাগো এগো । মাদইগাঙে ঘর  
ভিতরে উত্তরর কাদা উগোত মাটীহান উচকরিয়া উহানর গজে গ্লাস  
আগোত ঘটগো করিয়া গিথানক এগোৱে থাইতারা । ঘটগোৱ পানি  
উতা প্রতি বৃহস্পতিবাৱে নিঙোলে বদলানি লাগেৱ । গিথানক এগোৱে  
পাহাংপাৱ জিলক বুলিয়াউ মাততারা, লক্ষী দুৰ্গাৱ লগেউ অভিন্ন  
বুলিয়া মাততারা । রাজাৱ গাঙে এ প্রথা এহান নেই । তবে ঘরর  
গিথানক দৌজেলা আগো আছে বুলিয়া মাততারা । গিথানক এগোৱ  
হারৌ অইলে ঘর উগো নুঙেই অয়া থাইতারা উনি । রাত গিথা-  
নক এগোৱ ঘরর ভিতরে আটে আটে থাইরী । উহানলো ঘূমানিৱ  
আগে ঘরগো ঙকখি-ঙারাল করিয়া থনা লাগেৱ ।

মাটীৱ গিথানক—ঘরর দৌ হমা দিতে সেনামাহি, আপোকপা  
বারো মাটীৱ গিথানক—এ তিনোৱিৱ তিন চাঙলুক দেনা লাগেৱ ।  
এ মাটীৱ গিথানক এগো সম্বন্ধে বিশেষ কিতাউ হাৱ নাপেয়াৱ ।  
তবে মনে অৱতা, ঘর-গিথানীৱে বারো এ গিথানক এগোৱ অভিন্ন

পাউরি ।

সেনামাহি—ঘরর দক্ষিণ—পশ্চিম কোণে, অর্থাৎ বারণর কোণ উগোত দৌ এগো থার । গিরক এগো ঘরর রক্ষকগো । ঘরর দৌ হমা-দিতে তার নাঙে এইরুক বা চাঙলুক আহান দেনা লাগের ।

পাহাঙপা—গিরক এগো সেনামাহির বেরক । তা ফুংকা, বদা, চুরিতল বারো সুকুঙ বা নানা ইত্যাদি হুক'ঙ হক'ঙ পানির হুতর ফামে থার । পাহাঙপারে লা'লইলে, বা তারাঙ কোনো অপরাধ করলে, নানা-রকমর নুৱারার—বিশেষ করিয়া চিতারা—মাকারা বা অন্যধরণের চর্মরোগর—সৃষ্টি অর ।

আপোকপা — গিরক এগো পাহাঙপার পুতক, বারো মহাদেবর প্রকাশ আহান । তা লকেইর প্রধান দৌগো । তা বারণে থার । লকেই-হান লেহে রূপ তঙাল তঙাল । লকেইর পিপাগোর ঘরে গিরক এগোর প্রতীক শিলা আগো থয়া তারে বরাবর ভক্তিকরানি অর । কোনো কোনো ফামে ঘরর মূঙে খানি দূরেই করে ঘরশৌ আগো হুক'রিয়া আপোকপা গিরকরে থনা অর । বছরে নুৱা ধান পানার পিছে গিরক এগোরে যেসাদেউ আনুষ্ঠানিক ভাবে হমা দেনা লাগের । এইপাত বা ভাতলো গিরকরে হমাদেনা লাগের । কোনো কোনো লকেইত জিঙতা মাছ (যেমন, চেঙ বা পরম) আগো এ গিরকরাঙ কাতকরানি অর । আপোকপা গিরকরাঙ লালইলে নানারকমর নুৱারা-পানি বা বিপদ দেহা দেৱ ।

## নুৱারা, চিকিৎসা, রহস্যবিদ্যা

(ক) নুৱারা—(১) জেলেইরে রাত দৌরে জাতেইলে স্বান্হা অয়া অয়া নুৱারা অইতারা । (২) দৌরে ধরলে মান্দু থতাদে কলপুক সৌকরে সৌকরে স্বান্হা অইতারা । (৩) পরীরে বা হুইতানে আমল করিয়া থইলে মান্দু বিভূলা-সাবুলা অইতারা । (৪) ডাইনীয়ে ধরলে গারি হুকের । (৫) পাহাংপার ধরলে গারিত চিতারা মাকারা নুৱারা অর । (৬) চাকুমর দৌরে ধরলে গারিত ইরেই-খংলেই নিকুলের । (৭) খাল-নালাত থাই-

তারা দৌ উতরে লালয়া গেলেনা, তানু থাইতারা ফানে শেঙইলে, দৌ থাইতারা ফানে মাঙইলে বা লহি করলে ফট, ঘা, পেট-কামাড়া ইত্যাদি নানা রকমর নুরারা দেহা দেব। (৮) খেইতে দৌরে দেখলে পেটফুলা অর। (৯) ডাইনীৰ ইরলপার গতহান নুংশি পেয়া হুনলেউ পেটফুলা অর। (১০) ভাত খেইতে কুনোগোর লুশদাশ্টিলো চেইনেউ পেটফুলা অর। (১১) মানুরে মনুলো থামা দিলে গভবতী জেলেইরে শৌ জরমদিতে ভিলর।

(খ) চির্কিংসা — (i) (১) শৌ নুরারা অইলে হিয়রগোত হরণি বারো মালকে পিধা আঙালদুরি বা তলপুতি থদেনা ; মাল-কর আঙালদুরি বা তলপুতি উরাদেনা, বা উতালো গারিগো মাঠিয়া দেনা। উহান অইলে শৌ উগোরে দৌরে কাবু করে নুরারতারা। (২) শৌরে ঘরর বাহিরে নিতেগা মেইথংহানাত থঙমেইর বা টুপিৰ কালি পিধাদিলে পথে দৌরে না ধরতারা। (৩) তাপ উঠলে জাঙর ভরি আঙুলিত কালী লুরি বাধে দিলে তাপহান গজেদে না কার। (৪) নুরারা মিয়াম জবর অইলে তুলসীরাঙ অথবা গুরু আগোরাঙ উসিল সিল করলে আপদ-বিপদ হারগা, অর্থাৎ নুরারা উগো মরণেত্ত জিংতা অর। উসিল সিলকরানির নিয়মহান অইলতার ধূপ-থঙমেই, এইরা-তাঙথা দিয়া, ফুলের মালা আকডাল নুরারাউগোর তুলসীরাঙ বা গুরু আগোরাঙ পিধা দিয়া 'আজিত্ত মোর নুরারা-পানি এতা হাবি তি নিয়াদেগা' বুলিয়া হমাদিয়া ভিক্ষা মাগানি। (ii) (১) পাহাঙপার ধরিয়া গারিত চিতারা-মাকারা নুরারা অইলে নালা আহানাত গিয়া চাপাল দেনা। চৌলর কুড়ালো পাহাংপার মূর্তি আগো হংকরিয়া উগোর উদ্দেশ্যে চাপাল উহান দেনা লাগের। পাহাংপার চাপালে এ বস্তু এতা লাগের — ফুল এগো, 'এই এতা বারো ললর (খাগর) ডের এগো। (২) চাকু-মর দৌরে ধরিয়া শৌর ইরেইখঙলেই অইলে চাকুমর দলে দৌ উগোর উদ্দেশ্যে চাপাল দেনা। ইরেই খঙলেইর চাপালে বস্তু এতা লাগের আঙারা, হুকনর মুরি ৭ জাত বা ৩ জাত, ফাড়া ইংচিলর টুকারা বারো চৌলর কুড়া। (৩) লামচার ধরলে নালা আহানাত লামচা উগোর

উদ্দেশ্যে চাপাল দেনা লাগের । লামচার চাপালে জীব আগো দেনা লাগের-‘আস বা পারো অইলে হবা । যে কোনো চাপালে, চাপালহান হাভেরা মেইপাগো উহানলো নিকুলিয়া যানার পিছে নুৱারা উগোর ঘরগোদে নুওহান দিয়া বয়া থানা । মেইপা উগোর চাপালহান দিয়া আয়া পঠিয়েদেত্ত না আহানলো বা পুতি আহানলো মাঠিয়া মাঠিয়া সলদে সলদে ‘বালা অইলেতা ?’ বুলিয়া তিন খুকুম বা পাচ খুকুম আঙ-করানি । উবাকা নুৱারা উগোর, অথবা নুৱারা উগোর পক্ষত আৱাক আগোর ‘বালা অইলু’ ‘বালা অইল’ বুলিয়া মাতানি ।

(iii) (১) চিণ্ডুপীর ডেম চিণ্ডু করিয়া বা উতালো পিঠা হক-রিয়া খেইলে ত্রিফিমি পড়তারা । চিণ্ডুপীর ডেম ছিড়তই উগোর গজেদেত্ত লামে লামে আইতে ছিড়ানি লাগের । উজানি লামুনি ছিড়লে ও পাতা উতা খেইতই উগোরতা ক্রিমি উজেইতায় । (২) ত্রিফিমি উজেয়া শৌর তাপ বারো বঙানি নুৱারা অইলে তালুত ভরণ দেনা লাগের । ভরণর বস্তু অইলতায়—সেলডুমে গলা মাটী, অথবা গিল্লার ছাতু, অথবা আড়ির পানি, যানুৱা বারো রহণর তিলকরা ছাতু । যে কোনো ভরণ বেগীহান ভাটিয়ল দিলে লাগানি লাগের । (৩) ত্রিফিমির তাপ উঠলে তিলখুৱেই দেনা লাগের । তিল খুৱেইর মেঠেল এতা—তুলসী মঞ্জরী বা তুলসীপাতা, যোন্মাম, হুতার আঠির ভিতরর হার উতা, ধূপ, ফাকফই, গুলমরকাছি, লঙ । এতার ভিতরে প্রত্যেকহান মেঠেলর বস্তু বেজুড় অনা লাগের, মেঠেলর সংখ্যাউ বেজুড় অনা লাগের, বারো উতালো হংকরা গুল্লি উতাউ বেজুড় অনা লাগের । (৪) কাহানির তাপ বা যে কোনো তাপ উঠলে লকখুৱেই দেনা লাগের । গজে উল্লেখ করা তিলখুৱেইর মেঠেলর লগে চেচুৱা বারো আদা যৌকরে দিলে লকখুৱেই অর । লক খুৱেইরতাউ প্রতি মেঠেলর ভিতরর বস্তু, মেঠেল বারো গুল্লি সংখ্যা হাবি বেজুড় অনা লাগের । (৫) তাপে কেম্পাচলর রস, আদা বারো লঙ তিলারিয়াউ খুৱেই দেনা য়াকরের । (৬) রামতুলসীর পাতার রসউ তাপে হবা । (৭) কাণ দুহেইলে কেম্পাচলর ডাটা তপ্তা করিয়া

রস উতা চাঁপিয়া কাণে ভরাঁদিলে দুহানিহান কন্মের । (৮) তাপ উঠলে দৌর বা মান্দুর কুদৃষ্টি লাগলে লাগানির নানা ধরণর তাবিজ আছে ।

(৯) মন্ত্রলো ঝাড়িয়াউ নুরারা বা দৌ বা মান্দুর কুদৃষ্টি নুরারা-গোরে বালা করানি য়াকরের । (১০) মন্ত্রলো মুরকামারা, আহিয়ল, ফলি ইত্যাদি নুরারা বালা করানি য়াকরের ; কাটা কাড়ানি য়াকরের বারো হরপ কুকুরর বিষ কাড়ানি য়াকরের ।

(গ) রহস্যবিদ্যা—(i) (১) তাবিজ বা মন্ত্রলো নুরারা-পানি বালা করানি য়াকরের । (২) অনিষ্টকারী দৌ খেদানিরকা, বারো বাহিরেত্ত অনিষ্টকারী দৌ আহানি বন্ধ করানিরকা প্রতি বছরর পইলাদে চৌদ্দার বারো গাঙর কান করানি লাগের । নুরা বছর হমানির আগেকার দিনে চৌদ্দাত আছি দৌ উতারে এইরা-পানা দিয়া ভাহিয়া চৌদ্দাগত্ত সেচাদেনারকা হেইচা করানি, বারো বছরর পইলাকার দিনে মন্ত্রলো চৌদ্দাগো বাধিয়া দৌদক হমানি নিবিদ্ধ করানি । দৌ আগোরে রহালিগো করে থয়াউ চৌদ্দাগো রক্ষা করানি য়াকরের । ও দৌ উগোর চাকচা রীতিমতো দেনা লাগের । এসাদে দৌ-রাহালি থইলে চৌদ্দাত চর পেয়াউ হমা নুরারতারা । (৩) মান্দু মরলে গাতাঙর দিন উহান চৌদ্দাগোর বাহিরে খাদ্য বারো ধূপ-থঙমেই দিয়া মৃতাত্মা উগোরে ঘরর চৌদ্দাগোত আর না হমানিরকা হেইচা করানি লাগের । নাইলে ঘরর গজে মৃতাত্মা উগোর কুদৃষ্টি পড়ানির সম্ভাবনা । (৪) শনিবারে মরা মান্দু উগোরে দাহ করানির সময়ত যে পইছাহান মাটীত দিয়া শ্মশানহানর পূজা করতারা, উহান রাতি চরেদে আনিয়া গারিত পিদলে দৌরে শকনি নুরারতারা । (৫) তুলারশির মান্দু আগোরে মন্ত্রলো সলেয়া কুনো নুরারা আগোর নুরারার কারণ বারো নুরারাত বালা অনির উপায় আঙকরলে হারপানি য়াকরের । এসাদে সলানি উহানরে 'আজিরাত করানি বুলতারা । নুরারা উগোরে 'আজিরাত করি য়াউ উত্ত বিষয় উতা হারপানি য়াকরের । (৬) খইতু বাধিয়া বা খিল-যান করিয়া মুগুশুর্দ আগোর মরণহান বিলম্বিত করানি য়াকরের । খইতু

বাধানি বা খিলবান করানির নিয়মহান অইলতার—মন্ত্রলো পইলা তালদু-  
হানাত সলকরিয়া গারিগোর মিহুল উতা ফামে ফামে থদেনা ; পিছে  
খইতুগোত সলকরিয়া মিহুল উতা হাবি পুলকরিয়া বর্মগোর লগে  
থদেনা । খইতুবাধানি উহান না ছুটেইলে নুৱারা উগো না মরিয়া থার ।

(ii) (১) মন্ত্রলো চর ধরানি য়াকরের । (২) মন্ত্রলো 'থামা' দিয়া গুরু  
মইষর সৈলকম বন্ধ করানি য়াকরের, বারো শৌ-জরম দেনা বিলম্বিত  
করানি য়াকরের । (৩) পিড়াহানাত বহের উগোর লারিগোত পিড়া  
উহান মন্ত্রলো লাগাদেনা য়াকরের । (৪) কুনো আগোয় ভাত ৰাততে  
মন্ত্রলো ভাতর পানি শৌঅনি বারো ভাত হিজানি বন্ধ করিয়া থদেনা  
য়াকরের । শনিবারে মরা মান্দু উগোৱে পুড়ানির সময়ত ব্যবহার কর-  
তারা 'অলঙ উগো যাদুত লাগেব ; বারো উগলো মাইরে য়ারগা  
উগোয় মাইরহান জিঙব । মরা মান্দুগো দাহ করানির পিছে ৰাতি  
উহান মহাদেবে অর ভূত পেৱেত লগে নিয়া আয়া, মরাদেহ উগো  
নুৱা করে নিকালেয়া, উগো টুকাৱা টুকাৱা করলোকো পুৱি হাবিৱে বাটে  
দেৱ । ঔ সময়ত কুনো মান্দু আগোয় উলঙ্গ অয়া ঔ ভূত পেৱেত  
উতার হাদিত হনেয়া মরা উগোর কেঙুৱা আঙুলিগো আনে পারলে  
উগোলো অকল্পনীয় যাদু করানি য়াকরের । অদৃশ্য অনাৱ উপায়হান  
এসাদে—শনিবারে মরা শৌ আগো গাতেইলে ৰাতি নঙেইত মান্দু নীৰব  
অইতারা সময় উহানাত উলঙ্গ অয়া উপেয় যানা । গিয়া মরা দেহ  
উগো গজে পালাঙ আগোত টাঙিৱা মম বাতিলো পুড়ানি । পুড়লে ঔ  
দেহগোত যে কালিৱা তেলতৈলো আবরণ আহান পড়তই, উহান  
জাঙহানাত অকরিয়া মূৱগো পেয়া হাবি গারিগন্ত খতকরিয়া লনা ।  
ঔ কালি উতার লগে অ্যান্য বস্ত্ৰ মিলেয়া মন্ত্রলো সলকরানি ।  
ঔ বস্ত্ৰ উহানর ফুটা আগো মেইখঙহানাত লাগেইলে মান্দুৱে না দেখ  
তারা ।

মন্ত্রলো বস্ত্ৰ চালান দিয়া মান্দু মারানি য়াকরের । মন্ত্রলো খেৱি-  
চালান দিয়া চর ধরানি য়াকরের ।

## প্রাকৃতিক তত্ত্ব

(১) বেলী বারো জুনাফ—বেলী বারো জুনাফ দিয়োগি বেইবুনিহানি । আকদিন দিয়োগো নারারণ সেবা খানাত যিতেগা মালকে তেইরকা প্রসাদ খানি আনেদেনারকা মাতলো । আলখকঅয়া আহিলা আরো মালকে আঙকরতে বেলীয়ে পাহুরিয়া নানেছে বুলিয়া মাতলো হানতে তারে হাবিয়ে আলিপাকা বুলিয়া শিরাপ দিলো ; উহানলো বেলী এহান সারতা । জুনাফরে আঙকরতে নখর হাদিত খানি লুকুয়া আনেদেছে বুলিয়া মাতলো হানতে তারে হাবিয়ে বানাপাকা বুলিয়া বর দিলো । উহানলো জুনাফহানরে হাবিয়ে হবা পেইতারাতা । বারো, জুনাফে চরেদে আনেছেহান হারপেয়া তার গারিগোত দাগ আহান থাক বুলিয়াউ মালকে শিরাপ দিলো । উহানলো জুনাফহানাত কালা দাগ আহান আছেতা ।

জুনাফে নামরিল হজক—অলকগো লকেইর জেলা আগোর ফুলা আহানলো উঠানহানাত নামরিল হজক এতা ছরাদেছেতা । এতা খেইলে মান্দু এতা হাবি অমর অইতায় বুলিয়াতে বৌরাজার পেইরাক করে লঙলেইগোলো ও নামরিল হজক নিয়া জুনাফহানাত খানিলো । জুনাফহানাত কালা কালা দাগ দেহিয়ার উতা নামরিল হজক । আরাক মত আহানে মাতেরতায়, জুনাফহানাত কালা কালা দাগ দেহিয়ার উতা নামরিল হজকর গাহজার । হিমালয়েদে কায়া কুনোগোয় গিয়া গাহ উজারর পাতা আনে পারলেগা উতা খেইলে মান্দু অমর অইতায় উনি ।

গ্রহণ—বৌরাজার অলকগো লকেইর উঠানেত নামরিল হজক উড়িয়া নিলোগা সময় উহানাত কুলাহানর কাদাত কুকুর আগো আহিল উগো আকাশহানাত ফড়দিয়া গেলগা । ও অলকগো লকেইর কুকুর উগোয় বেলীহান গিললে সূর্যগ্রহণ অর ; জুনাফহান গিললে চন্দ্রগ্রহণ অর ।

আকাশ—আকাশ বা দিনএহান আগে তলহানাত আছিল ; মানুহে লাগপানি পারল। জেলা আগোয় গাহালিত শুকগোলো ধান ভানতে শুক উগো ঢক্ক লাগানিয়ে দিন এহান গুরুও করিয়া গজহানাত কা'ছেগাত। কুনোগোয় মাততারাভায়, শুক উগো বাবে বাবে দিনহানাত লাগের হানতে শোঅয়া হরণি হানলো দেছে বারি উহানাত গজেদে কাছেগাতা উনি। যারি এহানর লগে মাততারাভা—হিয়াল এতা উনি আগে হাগহানাত আছিলাত। তলে পৃথিবী-হানাত খুরা পড়েছে উতারে সেলকম পারাবেয়া উতা পিনারকা পৃথিবীত লামিয়া আহেছি সমর উহানাত হাগহান গজেদে কা'পড়ানিয়ে আর হাগহানাত যানা নু'বানলাত। উহানলো হিয়াল এতায় 'দুধ নাই খুরা' বলিয়া গজেদে চেয়া রহিতারাত।

ভূমিকম্প—পৃথিবী এহান অনন্ত হরপগোয় নে'পালহানাত করিয়া থেছেহান। নে'পাল আহানাত থইতে থইতে ঠুকরিয়া হেরে নে'পাল উহানাত সিলকরের উবাকা পৃথিবীহান লড়ের উহানরে ভইচাল বা ভূমিকম্প বলিয়ারত।

ধানর বাকল—আগে ধানর বাকল নেয়োছিল, অর্থাৎ ধানর গাছে চৌল ধরিল। ভিক্ষা মাগাত যারগা বৈষ্টপ আগোয় আকদিন লোভীহানে চরেদে চৌল উতা গাছেত ছিড়িয়া নেছিলগা। উদিনেত ধানর বাকল অনা অকরলত।

## প্রাকৃতিক বস্তু আয়ত্ত আনানি

- (১) চৌল হিচৌদিলে, বা বোহানাদে উজ্জিয়া শুক উড়াবিলে বোবরণ কমে
- (২) হুকন জিত বরাদিলে ঘরে বজ্র নাপড়ের।
- (৩) মহাপ্রভু জম'র পুড়া বাহার তুপ উতা ঘরে টাঙিয়া থইলেউ ঘরে বজ্র না পড়ের।
- (৪) বিষুর দিনে বাড়ীত খুদ হিচৌদিলে ছেনাপক না থাইতারা।

(৫) গরুর পারার গাঙ্গে দাত নিকালেয়া 'সি' করে মুর্কাছি দিলে  
ভাগা দাত উঠে ।

(৬) ভইচালর সময়ত মুরগোত ধরিয়া তুলেদিলে বাটি মান্দ উগো  
দীঘল অর ।

## আচার বা রীতি

আচার বা রীতির ভিতরে 'করানি থক' আকতা আছে, বারো  
'করানি থকনেই' বা 'গমনেই' আকতা আছে । অধিকাংশ রীতির ভিত-  
রেই কারণ বা যুক্তি আকেইহান খার । ও কারণ বা যুক্তি উতা মি  
বন্ধনীর ভিতরে উল্লেখ করেছ । অনেক রীতি নিকুলেছেতা ফাগি-  
ফারাঙেত্ত । এসাদে রীতি উতার ক্ষেত্রত বন্ধনীর ভিতরে 'ফাগিঙ অছে-  
হান' বুলিয়া উল্লেখ করেছ । কোনো কোনোতা মানসিক দুর্বলতা প্রশমনর  
উদ্দেশ্যে নিকালান্হিতা ।

## 'করানি থক' রীতি

(১) ভইচাল দিলে গারিত অইরী গিথানক উগোয় পালাঙর  
তলেদে লালনি বা স্বামীগোর জাঙর হাদিয়েদে লিতনি লাগের ।

(২) ভাত খেইতে খুচেইগো বাতেদে খনা, বারো পানি পিতে  
বাতর আতহানলো খুচেইগো ধরিয়া, বিঙর বারাহানলো খুচেইগো ঠিকা  
দিয়া পিনা ।

[ বিঙর বারাহান অনাচার বা মাঙ আরো ] ।

(৩) কলার পাতাত ভাত খেইতে পাতাহানর আগাবারা বাতেদে  
দেনা লাগের । [ হৌকিতা পাতার আগাগোদে ভাহিয়া যিতেগা বাতর  
বারালো থিঙকরানি নুঙেই অইবতা বুলিয়া ]

(৪) পুতকগো বারাদে যিতেগা মালকগোর পুতোকগোর ভরি  
আঙুলিগো ( মতান্তরে কেঁঙ, আঙুলিগো ) তিন খুকুম কামাভেয়া

‘মোর পেটগোত খোরিতা’ বুলিয়া নিজর পেটগোত মাঠিয়ানি ।

(৫) ধান বা চৌল মানরে দিলে বা বেছলে গুলি ‘আলকরিয়া ভাঙার-গোত থনা লাগের । [ ‘ভাঙারগো খালি নাক’—এ মানসিকতাত্ত নিকুলেছেহান । ]

(৬) দাত ভাগলে দাত উগো তলরগো অইলে ‘ববেইরো ববেই, মোর সাকতি দাতগো নিয়া তোয় হবা দাতগো দে’ বুলিয়া ঘরর চালহানর গজে উরা দেনা ; গজর দাতগো অইলে তিনজুড়া পথে বেলাদেনা । [ ‘তলর দাতগো গজেদে বাড়ক’, বারো ‘গজর দাতগো তলেদে বাড়ক’—এ মানসিকতাত্ত আছেহান । ]

(৭) কুপাঙলো সেলকম পিনা অইলে পিনার আগে কুপাঙর তলহান আকখুরুম চানা লাগের [ কুপাঙহানর তলে’ অর বা অনাচার পানি থাইলে উতা সেলকম পিনার সময়ত গড়েয়া হমা পড়বগা বুলিয়া । ]

## ‘করাবি থকনেই’ বা ‘গমনেই’ রীতি

১ । বৌদিতে বেছুনি গারিত লাগানি গমনেই ; লাগলে বেছুনি-হান মাটীত থাপারানি [ গারিত বেছুনি লাগলে বৌ-খানা ফাঙচা নার আরো । ]

২ । ডিগারা দিতারা গুরুগোর দড়িগাছ লালনি গমনেই ; লালনি লাগলে দড়িগাছ পাড়া দিয়া লালনি লাগের [ দড়িগাছে জাঙহান লাগিয়া পড়ানির সম্ভাবনা থার আরো । ]

৩ । ঘরর বদাগোত পাড়াদেনা বা উবা অনি গমনেই [ বদাগোত পাড়া দিলে গজেদে মুরগো লাগে পড়বগা বুলিয়া, বারো বদাগোত উবা অইলে মানর আটাউটি করতে অসুবিধা অর আরো । ]

৪ । রাত ঘর হুরিয়া গুড়া বাহিরে বেলানি গমনেই [ গুড়ার লগে আকুপা দরকারী জিনিষ পড়বগা বুলিয়া ।

৫ । খাঙলালর তলে বনা বা ভাত খানা গমনেই [ খাঙলালর গুড়া

- বা অনাচার বস্তু পড়ে পড়বগা বুলিয়া । ]
- ৬ । সেইচিলে উবা অনি বা কুনো কিছু খানা গমনেই [ চালহানাত গুড়া বা অনাচার বস্তু বা কুনো ভারি বস্তু পড়ে পড়বগা বুলিয়া । ]
- ৭ । ফুৎকার আগাত বহানি গমনেই [ ধুমা বা জিত্ত ফড়দের গুড়া আহিত হমা পড়বগা বুলিয়া । ]
- ৮ । কুপাঙলো সেলকস পিনা গমনেই [ কুপাঙর ভুলেত্ত 'অর বা অনাচার পানি গড়েয়া থতাত হমা পড়বগা বুলিয়া । ]
- ৯ । গারিত অইতারা ইমা-ইন্দোলে ঘাট বা থঙ লালনি গমনেই [ কুনো দুষ্টনা অইলে শোগো নষ্ট অপড়বগা বুলিয়া । ]
- ১০ । মাছে-সেলকমে আকসাটে খানা গমনেই [ দ্বায়োতাউ গরহজমি বস্তু আরো । ]
- ১১ । আধারে কিতাকাতা খানা গমনেই [ পকজক বা গুড়া অবশ্যভাবে হমা পড়বগা বুলিয়া । ]
- ১২ । রাতি লেইরিক আওকরিয়া থনা গমনেই [ কুনো অনাচার বস্তু গজে পড়ে পড়বগা বুলিয়া, বা পকজক বা মেকুরে কাপে দিবা বুলিয়া । ]
- ১৩ । ভাত খানার হাদিত চাকুম নিকানি, বা আরাক আগোয় 'আত থনা গমনেই [ থেয়া লম নাকরেছি উতার ভাত-হোর গজে চাকুম বা অনাচার পানি পড়ে পড়বগা বুলিয়া । ]
- ১৪ । ভাত খেইতারা উতারে থয়া, খানা লনকরেছি উতায় উঠানি গমনেই [ থেয়া লম নাকরেছি উতায় পেট না বৃজিয়া লাজপেয়া উঠবা বুলিয়া, বা তানুর গজে বা খাদ্যত চাকুম কিতা পড়ে পড়বগা বুলিয়া । ]
- ১৫ । পুতি বুনতে বেত্তর আগাদে থানা গমনেই : মুনিশোঁরাঙ বেত্ত লাগলে উতার জেলেই (কইনা) নাপেইতারা [ বেত্তহান লাগলে দুহেইবা বুলিয়া, বারো পুতি বুনানিতৌ অসদ্বিধা অর আরো । ]
- ১৬ । অদাবস্যা বারো পুণিমাতে 'আল ধরানি গমনেই [ এ এ তিথিত

কারিক পরিগ্রহ করলে আচুলা-নুদ্বারা বারো বাত-নুদ্বারাত সাক্ষী  
আরো । ]

১৭ । দালো আঙানি গমনেই [ দা লাগে পড়বগা বুলিয়া । ]

১৮ । মানুর গারি বা জাঙ লালনি গমনেই [ গারি বা জাঙ লালনি উহান  
অনাঙ্গরহান আরো । ]

১৯ । পালাঙর তলেদে আটানি গমনেই [ পালাঙর পুঁতিত অনাচার  
পানি পড়ব বুলিয়া । ]

২০ । ভাত রাধতে চুল এড়াদেনা গমনেই [ ভাতহোত চুল হমা পড়-  
বগা বুলিয়া । ]

২১ । খাটল-খাকালেহাউ ইত্যাদি কুকলো ঘরর খুঁটি দেনা গমনেই  
[ ফল-ফুলর গাহ মাঙ নাক বুলিয়া । ]

২২ । পিনার পানি দিত খুঁচেইগোর গজহানাত ধরানি গমনেই  
[ পানি উতা আতহানাত লাগলে অনাচার অপড়বগা বুলিয়া । ]

২৩ । বোঁরেইয়ে বিনকহোরকলকেইয়ে ছকপাল অনা গমনেই [ চরিত্র-  
স্থলন 'অপড়বগা বুলিয়া । ]

২৪ । সেঙ্কাত শোলো বারাপে যানা, বা বারোবাজিত শোলো লাহাঙেদে  
আটানি গমনেই [ কুনো দ'ঘ'টনা' অপড়বগা বুলিয়া । ]

২৫ । রাতি হুঁচি দেনা বা আনানি গমনেই [ পড়লে মাঙো পড়বগা  
বুলিয়া, বারো অদৃশ্য ফামে পড়লে 'আত-জাঙে বিধে পড়বগা বুলিয়া । ]

২৬ । রাতি আন্দিরে আন্দ বুলানি গমনেই ; উতারে রঙ বুলানি,  
লাগের ।

## খেলা ধূলা

১। ডুডু বা কাবাডি খেলা ।

২। গিল্লা খেলা—কুকর গুলডুরা চাকা আহান অথবা গিল্লার আঠি আগো ৮/১০ আত দুরেইর কুক আকচিলাত লাগা লাগা খেলানি ।

৩। সনমনিকা—এ খেলাত কতোগোর পিঠিয়েদে আত বেড়াবেড়ি দিয়া উবা অইলে যে কুনো আগর আতহানাত আগোর গুটি আগো থনা ; ও গুটি উগো কারাঙ আছে উহান আরাক আগোয় মাতানি ।

৪। তেঙতাঙ—এ খেলাত মাটীত কতোগোর 'আত উবুরি করিয়া থইলে, উতার ভিতরর আগোয় 'তেঙতাঙ' বুলিয়া ছকয়া লমরগা 'আত উহান 'মরা' বুলিয়া ধরানি ।

৫। গুল্লা—এ খেলাত মানু আগোর ফাম আহানাত উবা অয়া তার দলর অন্যান্য উতারে পারেঙহান করিয়া 'আতে ধরানি ; পারেঙ উহানর মানু উতায় অন্য পক্ষর মানু উতারে ছকো পারলে উতা 'মরা' অনা ।

৬। কুকারা কুকুরী—এ খেলাত কতোগোর 'আতে ধরাধরি বা গুলগো অয়া উবা অনি । উতার হাদিয়েদে আগোয় আরাক আগোরে তাল করিয়া ছকনি এহানরে 'বাঘ-গুরু' খেলা বুলিয়াউ মাততারা ।

৭। চিণ্ঠিকি—এ খেলাত আগোর আহিগো গুড়েদিতে অন্যতায় লুকানি; পিছে যোগোর আহিগো গুড়েদেছিলো উগোয় লুকানি উতারে বিছারেয়া নিকালানি ।

৮। লাইখেলা—পানিত হাতুরে হাতুরে আগোরে আগোয় শকাশকি দিয়া খেলানি ।

৯। কুম্ভু খেলা—এহানো পানিত হাতুরে হাতুরে খেলতারা খেলা আহান ।

## ঘর-দুবারর নমুনা

১। ঘর পূর্বমুখী চারিচালি দীঘলি করে হওকরানি অর, অর্থাৎ চারিচালি ঘরগোর দীঘলি বারা উহান পূর্বপশ্চিমে থার। ঘরর মূঙর অংশ আহান বেড়লো তঙাল করিয়া মূঙহান খালি করিয়া থনা অর; উহান মাঙকলহান। মাঙকলহানর বাতরবারার কাদা উগোত খানি বুকগোদে মূঙেদে করে খুটা আগো থার উগোর কাদাত ঘরর বৃজ নগো বহানির পিড়াহান বা ফিটাহান থার। ঘর ভিতরর দক্ষিণ-পশ্চিমর কাদা উগোরে সেনামাহি-গিরকর কোণগো বুলতারা; উপেইত বারণগো বহানি 'অর; উত্তর-পশ্চিমর কাদা উগোত চাকামহান বহানি অর; উহানর পূর্বদে নিঙোলর কা-হান। ঘর-ভিতরর দক্ষিণ-পূর্ব কোণ উগোত ঘরর বৃজনগোর ফামহান বহানি অর; উত্তর-পূর্ব কোণে অতিথির ফামহান থার।

গুরু-মইষর সাঙগো বা বৈঠপগো ঘরর মূঙহানাত দেনা লাগের। ঘরগো বারো সাঙগোর বুকুত উঠানহান থার। ঘরর মূঙে বিড়র বারাদে তুলসীপুঙগো বা দৌর লেইসাঙগো বহানি অর।

